

გიორგი
ნახუცრიშვილი

ფილოსოფიანი

დრამა (თბილისი მოქმედებად,
ათ სურათად)

მოქმედი პირები

ნიკალა ფიროსმანი.
დიმიტრა, მისი კომპანიონი.
სონა, დიმიტრას ცოლი.
ვარინკა, დიმიტრას ობოლი დისწული.
სოლიკო, ახალგაზრდა ოფიცერი.
პროხორი, გოროდოვოი.
მარგარიტა, შანსონეტი.
მადამ ლილი.
ჩასუქებული ვაჭარი.
გამხდარი ვაჭარი.
კირილი } პეტერბურგის სამხატვრო აკადემიის სტუდენტები.
მიშელი }
ლადო, ქართველი მხატვარი.
ალექსი, მიკიტანი.
ივანიკა, მისი ხელზე მომსახურე ბიჭი.
არსენა ჯორჯიაშვილი.
დავით ზურაბიჩი, მდიდარი მოიჯარადრე.
ბეგო }
სერგო } ნიკალას ამფსონები
გეო }
კირაკოზა, მეეზოვე.
კონფერანსიე.
ოფიციანტი.
პოლკოვნიკი.
მოხუცი დედაკაცი.
როსკიპი ქალი.
უცნობი კაცი (ჯაშუში).
ბოქაული.

I მოქალაქე } მოხუცები.
II მოქალაქე }

მეშუშე.

ყენი.

ბაზაზი.

ყასაბი.

მეთევზე.

I ამფსონი }

II ამფსონი } დავით ზურაბიძის მეგობრები.

გოგია, დიმიტრას ვაჟი, 10—12 წლის (უსიტყვო როლი).

მოქმედება პირველი

სურათი პირველი

სახლის ბანი ძველი თბილისის შუაბაზართან. ბანზე — ბლომად მწვანე ბალახი, რომელზედაც გულაღმა წევს ნიკალა ფიროსმანი. იქვე — პატარა მოლბერტი და საღებავების მოზრდილი ხის ყუთი. პორიზონტზე, შესაღამოვების ფონზე, მკვეთრად მოჩანს ნარიყალას ნანგრევები.

ნიკალა (გატაცებით ცას გასცქერის).

ცისა ფერს, ლურჯსა ფერს...
პირველად ქმნილსა ფერს,
სიყრმიდგან ვეტრფოდი...

(პაუზა.) შენ გენაცვალე, თბილისის ცაო!.. ო, რომ იცოდე, როგორ მიტაცებ... ასეთ სიღრმეს და ასეთ სილურჯეს რა საღებავი გამოხატავს... თუმცა... მოიცა, ბიჭო... ოდნავ თალხიც რომ დავუმატო, მაშინ კი, ძგონი, სწორედ ასე გალილისფრდება... (წამოხტება, საღებავს აზავებს, ფუნჯს ტილოსთან მიიტანს, მაგრამ შედგება.) არა. ჯერ არა... ცოტა იასამანიც შევურიო... (უმატებს, სინჯავს, ფუნჯს ოდნავ წაუსვამს ტილოს და დაკვირვებით სინჯავს. გახარებულია.) ის არის, ისა!.. (ცას გახედავს, თავის საღებავის ფერს ადარებს.) მგონი ეხლა კი მივაგენი მაგ შენს ღვთიურ ფერს... (გატაცებით მუშაობს. თან ლილინებს.)

ცისა ფერს...
ლურჯსა ფერს...
სიყრმიდან ვეტრფოდი...

(ბანზე ამოდის ტანწერწეტა ლამაზი ქალი ვარინკა ჯამით ხელში. იგი მოკრძალებით შეჩერდება. მცირე ხანს ასე ტკბება ნიკალას ცქერით, შემდეგ ფრთხილად დადგამს ჯამს სამფეხა სკამზე და ასევე ფრთხილად აპირებს წასვლას, მაგრამ ნიკალა მოტრიალდება.)

ნიკალა. ვარინკა!.. შენა?
ვარინკა (წამოწითლებული, შემობრუნდება). აი, საქმელი მოგიტანე.

ნიკალა. ქალო, რაზედ გარჯილხარ... ამომძახებდი და...

ვარინკა. რა ვიცი... ვიფიქრე, ალბათ ხატავს-მეთქი და...

ნიკალა. დიდი მადლობა, ჩემო ვარინკა!.. აღარც კი ვიცი, რითი გიზლო ამდენი ზრუნვა... (ვარინკა წასვლას აპირებს.) მოიცა, ქალო... აი აქ, ჩემ გვერდით დაჯექ... (ვარინკა მოკრძალებით ჩამოჯდება.) აბა შეხედე ჯერ ცას და მერე აი ამ ჩემს ფერს... ხომ ჰგავს ჰა?..

ვარინკა (ადარებს). დიახაც რომ ჰგავს... ძალიანა ჰგავს...

ნიკალა (უკვე დაეჭვებული დასცქერის ტილოს). ჰმ... არა, არა... თითქოს რაღაც აკლია კიდევ...

(გარედან მოისმის ძახილი.)

ხმა გარედან. ნიკალა! ძმაო!..

ვარინკა (წამოვარდება). ვიღაც გკითხულობს... ეხლავე ამოგიყვან. (გარბის.)

ნიკალა. ეჰეი, ვინ არის მანდა?... (ბანზე ამოდის ტანადი და ლამაზი ახალგაზრდა ოფიცერი, რომლის დანახვა ნიკალას ძალიან გაახარებს.) ბიჭო სოლიკო... უცებ ვერც კი გიცანი!

სოლიკო. ჩემო ნიკალა!.. (ერთმანეთს გადაეხვევიან, გადაკოცნიან.) ბიჭო, როგორ დამშვენებულხარ, როგორ დავაუკაცებულხარ...

ნიკალა. შენც, შენც, ჩემო სოლიკო!.. საიდან, კაცო, ასე მიულოდნელად?

სოლიკო. პეტერბურგიდან! სწავლა დავამთავრე და აი ეხლა უკვე ოფიცერი ვარ...

ნიკალა. სხვა, ჩემი ქალბატონი ელისაბედი როგორ ბრძანდება?

სოლიკო. ეე, დედაჩემი უკვე მოხუცდა... შენთან მოკითხვა დამაბარა. სწორედ მის სანახავად ჩამოვედი და ისევ მალე უნდა წავიდე...

ნიკალა. სად, კაცო?

სოლიკო. ისევ პეტერბურგში...

ნიკალა. ბიჭო, იქ რა გინდა... დარჩი, აქ იყავ!..

სოლიკო (ტუჩაბზუებით ხელს ჩაიქნევს). იჰ, აქ რა მინდა!.. ჰო, მართლა, ძმაო, ძლივს მოგაგენი... დალოცვილო, ამ ბანზე რამ ამოგიყვანა?

ნიკალა (ჩაილიმებს). ჩვენი თბილისის ცის სილურჯემ... (იცინიან.)

სოლიკო. ეს ამდენი ბალახი რაღა ამბავია?
ნიკალა. რა ვქნა, ძმაო... ეს ოხერი, სოფელი მიყვარს... მი-
ყვარს მისი სიმწვანე და მისი სიგრილე... მაგრამ ველარ მივდივარ
და აი ასე მწვანე ბალახზე დავწვები ხოლმე და, სიმართლე გითხ-
რა, ისე მეამება...

სოლიკო (იციინის). ოო, რა გაუსწორებელი მეოცნებე ხარ...
შენ ალბათ ღამეც აქა გძინავს?

ნიკალა. აბა მაშ როგორ!.. აი ასე გულაღმა ვწვები და დიდ-
ხანს, დიდხანს ვერ ვძინებ...

სოლიკო. რატომ?

ნიკალა. ვარსკვლავებიან ცას გავცქერი და... რაღაც ოცნე-
წამილებს ხოლმე... ასე მგონია, ვარსკვლავები რომ ციმციმებენ,
თვალს მიკრავენ და თავიანთკენ მიხმობენ-მეთქი...

სოლიკო (მოლბრეტს დახედავს.) ბიჭოს, შენ ისევ ხატავ?..

ნიკალა (დრცხვენით). ჰმ... უფრო გამწარებული!.. (იციინიან.)

სოლიკო. საოცარია, რომ იმ ყმაწვილურმა გატაცებამ არ გა-
გიარა... გახსოვს, თექვსმეტი წლისა რომ შესრულდი და მამაჩემი
შეგეკითხა, რა ხელობაზე მიგაბაროო, და შენ რომ ხვეწნა დაუწყე,
მე მხოლოდ მხატვრობა მენატრებო...

ნიკალა. აჰაი დედასა... რა ადვილი მეგონა მაშინ მხატვრად
გახდომა...

სოლიკო. ამას რას ხატავ?..

ნიკალა. ჩვენი დიდების აი ამ ნაშთს...

სოლიკო. ნარიყალასა?

ნიკალა. დიახ! დღეს ჩემი გული ნიკოლოზ ბარათაშვილით
არის სავსე... წედან „ბედი ქართლისა“ გადავიკითხე და უცებ
თვალწინ დამიდგა ნარიყალაზე მეფე ერეკლე... ღურბინდით ხელ-
ში... კრწანისის მინდორს გადასცქერის და იქ კი:

დაჰკრეს ნაღარა,
გულნი შეზარა,
და მტერთ საომრად
ჯარნი შეჰყარა...

აი ეს მინდა გამოვხატო, თუკი შევძელი...

სოლიკო. ეე, შენ კვლავ პოეტად დარჩენილხარ... მართლაც-
და, შენ რომ ხატვა გესწავლა...

ნიკალა. ეჰ, სოლიკოჯან, თქვენთან „პოვრობა-ლაქიაობაში“
რას გავხდებოდდი... დიდი მადლობა დედაშენს, რომ წერა-კითხვა
მაინც მასწავლა...

სოლიკო. კი, მაგრამ ეხლა ფული გაქვს... ვინმე ოსტატს რომ
მიებარო...

ნიკალა. შენ კი გაიხარე!.. ორ ნასწავლ მხატვარს უკვე მივ-
მართე, მაგრამ ჩემს ნახატებს ახედ-დახედეს და ასე მომახსენეს:
ტყუილუბრალოდ დროს ნუ დაკარგავ... ამ საქმისათვის უნიჭო
ხარო...

სოლიკო. მერე?

ნიკალა. მერედა არაფერი! ჩემთვისდა ვხატავ... ჭიას ვახარებ...
მინდა როგორმე გულიდან გადავიგდო, ხელი ავიღო, მაგრამ ხატვის
ჟინი რომ ამიტანს, კედლებს ვასკდები... თუ არა ვხატე, ასე მგონია,
გავგიჟდები... მთელ ჩემს სიცოცხლეს აზრი უქრება.

სოლიკო. ბიჭოს! ეს კი იმასა ნიშნავს, რომ ნამდვილად მხა-
ტვრად დაბადებულხარ...

ნიკალა. მართლა, სოლიკო? უჰ, ბიჭო, შენ იდღეგრძელე!
(დაფაცურდება.) კაცო, ძმაო, ამ ბანზე რაღასა ვდგევართ... წამო,
ჩავიდეთ ჩემს ოთახში... ჩემს სურათებსაც გაჩვენებ ბარემ...

სოლიკო. წავიდეთ... ვნახოთ...

ნიკალა. მერე კი აქვე სამიკიტნოში უნდა ჩამომყვე. ჩვენი
შეხვედრის მაღარიჩი უნდა დავლიოთ...

სოლიკო (იციინის). არა, ნიკალა... იმ დახუთულ სამიკიტნოში
ხომ დავიხრჩვებით. თუ ეგრე გინდა, მოდი, გორგიჯანოვის ბაღში
წავიდეთ... იქ გრილა კიდევ... მუსიკაც უკრავს...

ნიკალა. ბაშუსტა, ძმაო... მე იქ არასდროს არა ვყოფილვარ,
მაგრამ, როგორც გენებოს... აი ამ საღებავებით შესვრილ ტანსაც-
მელს გამოვიცვლი და...

(ბანიდან ჩამოდიან. სცენა ტრიალებს და მაყურებლის წინაშე გადაიშლება ძველი
თბილისის შუაბაზარი. მარჯვნივ კუთხეში — ნიკალას რძის პროდუქტების დუ-
ქანი აბრით „მოლოჩნაია“, ხოლო ამ წარწერას აქეთ-იქიდან მიხატული აქვს
თითო ძროხა. დუქნის თავზე მოჩანს ბანიანი ოთახი, რომლის ფანჯრიდან ნიკალა
და სოლიკო ქალაქს გადასცქერიან. ამ დუქნის ჩაყოლებით მიჯრილია სხვა დუქ-
ნები — ბაზაზისა, ყასაბისა, მეთეფისა და სხვა. გადასწვრივ — სამიკიტნო, საი-
დანაც მოისმის არღნის ჭყვიტინი, მოქეიფეთა სიმღერა და ხარხარი. სცენის იქით
იგრძნობა ბაზრის გაგრძელება, საიდანაც მოისმის შეძახილები.)

„პაპა-პაპა-პაპა-პაპა!..“ „ეს რა მოგვიტანია!.. ეს რა მოგვიერთმეგია“... „დავია-
ფეთ, დავაიფეთ!“ „ქობები მოსაკალი, სამოვარი მოვკალამ!“ რიბა, რიბა,
რიბა, რიბა!.. „ხურმა მოვიდა, ხურმა, ძველ კალოშებზე, წამლის შუშებზე.
„პაპ, პაპ, პაპ, პაპ!..“ „რა მწვანელია! რა მწვანელი!.. პატარძლის ხელით დაკ-
რეფილი!“ „ამ კოხტა ვირის მოტანილი!“... „ეჰეი, თულუხჩი!..“ „წყალი მოიტა!..“
„ქაა, სტოი, კონკა!.. წამო, კეკე!..“ „ხაში უგლეი!.. ხაში უგლეი!“

სოლიკო (უგუნებოდ). მაინც არ მესმის, აქ რა არის საინტე-
რესო... აბა, მითხარი, აქ რას დახატავ?

ნიკალა. როგორ თუ რასა? ჩვენს დედა თბილისს... ჩემს
ტკბილ კახეთს... მთელ საქართველოს... (ბაზარზე მიუთითებს.) აი,

რამდენი რამ არის დასახატი, თუ თვალი გიჭრის... აბა შეხედე იმ ტიემოკიდებულ კურტნიან მუშას და შეშით დატვირთულ ამ სახედარსა... (გულისტკივილით.) თუ ძმა ხარ, რაღა განსხვავებაა ამ ადამიანსა და იმ პირუტყვს შორის...

სოლიკო. ჰმ... ორივე მზიდავი საქონელია!

ნიკალა. ანდა... თუ მხატვარი ხარ, აი ის კაცმა როგორ არ დახატოს...

სოლიკო. რა?

ნიკალა. აგერ ის უშვილო მილიონერი და აი ეს ლატაკი, წერილშვილი ქალი... საოცარია, ვისაც ურიცხვი ფულები აქვს, შვილი არა ჰყავს... და ვისაც ბევრი შვილები ჰყავს, ფული არა აქვს... და აბა ეხლა გამოიცანი, მაგ ორში ვინ უფრო მდიდარი და ბედნიერია?

სოლიკო. ოჰ!.. რა თქმა უნდა — მილიონერი!

ნიკალა. სცდები, სოლიკო!.. საწყალი დედაჩემი იტყოდა ხოლმე: შვილებზე ტკბილი, შვილებზე დიდი სიხარული და სიმდიდრე ამქვეყანაზე არაფერიაო... ანდა, მითხარი, სხვაგან სად ნახავ ასეთ თულუხჩის, ან ისეთ მკალავს... აი ამ მხერხავს... იმ მენახშირეს... ამ დარბაისელ ყარაჩოხელსა... ანდა ამნაირ თაბახიან კინტოს? მხოლოდ თბილისში! მხოლოდ აი აქ!

სოლიკო. მერედა ეგ ყველაფერი ვის რად უნდა?

ნიკალა. როგორ თუ ვისა? შე დალოცვილო, სხვები სამარყანდის ბაზრებს ხატავენ და ჩვენი თბილისის ამ ჭრელმა ხალიჩამ რა დააშავა?

სოლიკო. ეგ ყველაფერი მოისპობა, წავა, გაქრება...

ნიკალა. ჰოდა, მით უფრო უნდა დავხატოთ, რომ მომავლებმა ცხადად წარმოიდგინონ, თუ როგორი იყო ჩვენი თბილისი, რომ მერე თავიანთ თბილისს შეადარონ... რა ვქნა, ძმაო, ძალიან მიყვარს ჩვენი ხალხის შნო და ლაზათი. ჩვენი თბილისიც ძალიან მიყვარს... რასაც ვხედავ, იმასა ვხატავ...

სოლიკო. ეჰ, სისულელეა!.. (შორიდან მოისმის ხალხის სიცილ-ყრიაშული და დაფა-ზურნის ხმა.) ეს რაღა ამბავია?

ნიკალა. ყეენობაა!.. ჩვენი ლამაზი ყეენობა!

სოლიკო. ეგეც დიდი არაფერია! შენ უნდა იტალიური კარნავალები ნახო!

ნიკალა. რას ამბობ, ძმაო... ეს ჩვენია!... ქართულია... ამას იტალიებში ვერა ნახავ... ეს ჩვენი თეატრია... წამო, ჩავიდეთ, ახლოს ვნახოთ...

სოლიკო. წავიდეთ... თუ ძმა ხარ, გორგიჯანოვის ბაღში წავი-

დეთ... (ფანჯარას მოშორდებიან; ბაზრის მოედანზე შემორბის ხალხი, რომელიც აქლემზე მჯდომ ყეენს შემოსდევს. „ყეენის“ „ვეზირები“ ზურნას უკრავენ, ჯოხებით ხალხს მოარღვევენ. დუქნებიდან მედუქნეები გამოდიან. საერთო სიცილ-ყრიაძული. შემოდიან ნიკალა, რომელსაც უკვე ევროპული კოსტუმი აცვია, და სოლიკო. ყეენი მათკენ დაიძვრება.)

ყეენი (ნიკალას). შენ ეი, ეხლავე თაყვანი მეცი და შემაქე, თორემ...

ნიკალა (სიცილით). რათა, შენი კვნესამე?!

ყეენი. იმიტომ, რომ შენი მბრძანებელი ვარ!

ნიკალა. მერედა, რისთვის შეგაქო?... რა სიკეთე მოგიტანია?

ყეენი. ვერ უყურებთ ამ უხიაკსა! ბიჭო, ამაზე მეტი სიკეთე გინდა? შენი დამპყრობი და მბრძანებელი ვარ!

ნიკალა. დიდი მადლობა, შენი ჭირიმე, მაგრამ მაგისათვის მაინც ვერ გაქებ!

ყეენი. აა, მაშე ვგრე!.. ეი, ვეზირებო!.. ეხლავე თავი წააგდებინეთ!

(საერთო ხარხარი.)

ნიკალა (სიცილით). ოღონდ ნუ მომკლავ, დიდო ყეენო, და ეხლავე გაქებ-გადიდებ!

ყეენი. ჯერ ხარკი გადაიხადე!

ნიკალა. ინებე, ჩვენო მბრძანებელო!.. (ფულს მისცემს. დამსწრენი კვლავ ხარხარებენ.)

ყეენი (ბაზარს გადასახებს). ეჰეი, გურჯო მედუქნეებო! ეხლავე ხარკი მომართვით, თორემ სუყველას თავებს დაგაყრევინებთ!..

(დუქნებს ჩამოუვლის.)

სოლიკო. თუ ძმა ხარ, წამო... უკვე მომბეზრდა...

ნიკალა. წავიდეთ, ძმაო... თუმცა, ჯერ მოდი ჩემს კამპანიონსაც გაგაცნობ ბარემ... (დუქნის კარებში მდგომ დიმიტრას.) ძმაო დიმიტრა, გაიცანი! ეს სოლიკოა! ამათ ოჯახში გავიზარდე ობოლი ბიჭი.

დიმიტრა. ძალიან სასიამოვნოა! (ხელს ჩამოართმევს.)

ნიკალა. აბა, ნათლიმამ!.. მე მივდივარ და...

დიმიტრა (გვერდულად ჩაიღიმებს). რაა, ისევ საქეიფოდ?..

ნიკალა. აბა მაშე ასეთ ძვირფას სტუმარს პატივი არ ვცე?.. თუ ძალიან დავიგვიანო, დუქანი შენ დაკეტე...

დიმიტრა. კეთილი, ძმაო!..

(სოლიკო და ნიკალა გადიან.)

ს უ რ ა თ ი მ ე ო რ ი

გორგიჯანოვის კაფეშანტანი. დიდი დარბაზი ლოყებით მარცხნივ — სცენა. ბალიდან მოისმის სასულე ორკესტრის მიერ შესრულებული შტრაუსის ვალსი და შეძახილები: „აგოშ!“, „ადრუა“ და სხვა. დარბაზში მაგიდებს უსხედან კარგად ჩაცმული მოხელენი და შეძლებული ვაჭარ-ინტელიგენტები. ფრაკებში გამოწყობილი ოფიციანტები მირბი-მორბიან მაგიდებს შორის. შემოდინ ჩასუქებული და გამხდარი ვაჭარი. ერთ-ერთი ოფიციანტი პირმოთნე ღიმილით გაუძღვება მათ და უკვე გაწყობილ მაგიდასთან დასვაძს.

გამხდარი ვაჭარი. შენ, გეტყობა, ყოველ ღამეს აქ ატარებ, რომ უკვე დაბევებული მაგიდაც გქონია...

ჩასუქებული ვაჭარი. აბა, მაშ რა ვქნა! როგორც კი მალაზიას დავკეტავ ხოლმე, იმწამსვე ეტლში ვჭდები და ჰაიდა აქეთკენ! შინ ცოლ-შვილი მიტირის თუ!

გამხდარი ვაჭარი. მაინც, რაღა აქ დაცანცალებ ჰა?... (ეშ-მაკურად.) შენ გგონია, მე არაფერი ვიცი?

ჩასუქებული ვაჭარი. ჰმ... ჩვენს ქალაქში გაუგებელი დარჩება რამე? მოკლედ, ხომ იცი აქ რომ ერთი ფრანგი ქალია — სახელად მარგარიტა... ჰოდა, პირველად როგორც კი ვნახე, იმწამსვე ისეთი ხოში ჩამივარდა, რომ, ჩემმა მზემ, მადა დავკარგე... აღარ მეძინა...

გამხდარი ვაჭარი. რათაო ვითომ? ვერ დაიყაბულე?

ჩასუქებული ვაჭარი. ჯერ დიდხანს ვერა... ბევრი მაწვალა... მერე კი — ჰაი ფულები, ჰაი საჩუქრები, და როგორც იქნა ბედს ვეწიე...

გამხდარი ვაჭარი. ოჰო! მომილოცნია! მეტი რა გინდა? ჩასუქებული ვაჭარი. ეჰ, ამ სამი ღლის წინ გამებუტა... ნომრიდან გამომავდო...

გამხდარი ვაჭარი. ბიჭოს! რათაო?

ჩასუქებული ვაჭარი. კრიჟანგი ხარო... ამიტყდა, გინდა თუ არა პეტერბურგში წამიყვანეო, იქ მაცხოვრეო...

გამხდარი ვაჭარი. ჰმ!.. შენ ფულს დაახარჯებ, ეგ კი იქ სხვებს გაიჩენს...

ჩასუქებული ვაჭარი. მაშ არადა! სულელი ვარ?! იცი, რამდენი დამიჭდება? რომ ვიანგარიშე, თავზე რქები ამომივიდა.

გამხდარი ვაჭარი. დამიჭერე!.. მაგნაირ ჩიტებს ფულის საკენკით ვერ გააძღობ! უარი უთხარ!

ჩასუქებული ვაჭარი. აკი ვუთხარი და გამომავდო! სულ კრიჟანგი ღორი მეძახა!

გამხდარი ვაჭარი. დალოცვილო, შენც რა გატირებს...
გაუშვი, წავიდეს, სხვები გააბრიყვოს...

ჩასუქებული ვაჭარი. ჰმ, რა ადვილად ლაპარაკობ! შენ
რომ იცოდე, რა გოგოა! ერთხელ თუ ნახე, ტყუილია, ველარ მოს-
წყდები!.. ჰკუიდან შეგშლის, დაგწვამს, დაგდაგამს...

გამხდარი ვაჭარი. ჰოო! მაშ თუ ეგრეა, უნდა დათანხმდე.
ჩასუქებული ვაჭარი. რას ამბობ, კაცო! იმდენი ფული
გავიმეტო?..

(განაგრძობენ ბაასს. შემოდინ სოლიკო და ნიკალა.)

სოლიკო. მადლობა ღმერთს, აქ ყველაფერი რუსული და ევ-
როპულია. ზურნის ჰყვიტიანი და დოლის ბაგუნი არ შეგვაწუხებს.
(მაგიდას მოუსხდებიან.)

ნიკალა. როგორ? შენ აღარ გიყვარს ზურნა და დოლი?

სოლიკო. არა! არც წინათ მყვარებია. ყველაფერი აზიური
ჩამორჩენილი და მეშხანურია... მე იმ დასკვნამდე მიველ, ჩემო ნიკა-
ლა, რომ სჯობს ყველამ ერთ დღეს ქართველობაზე ხელი ავიღოთ...
ერთიანი დიდი სამშობლოს შვილნი გავხდებით და ვიამაყებთ...

ნიკალა. რას ამბობ, კაცო!.. საქართველო?.. ქართველი ვრი?

სოლიკო (იციინის). ძმაო ნიკალა! აბა ირგვლივ მიმოიხედე!
სადღაა, ბიჭო, საქართველო ან ქართველობა?! ვერა ხედავ, ყვე-
ლაფერი უცხოურია! მწვადის მაგიერ — კატლეტებსა ვჭამთ! კახუ-
რის ნაცვლად — შამპანურსა ვსვამთ... ფანდურის ნაცვლად გიტა-
რას ვისმენთ... ქართულის მაგიერ ყველა ვპარუსკობთ... უბრალო რა-
ჰველი მზარეულიც კი ასე ამბობს: კერძი შევაზაპრავეო! აბა, მითხა-
რი, სადღა არის აქ საქართველო?

ნიკალა. სადღა, აი აქ... აი ამ გულში!.. (მკერდზე ხელს დაი-
დებს).

სოლიკო. არა, ძმაო! ეგ ვერ გვიშველის... ჩვენი საქმე უკვე
განწირულია... ისტორიამ წელში გავვტეხა...

ნიკალა. სოლიკო! ნუ მიშხამავ შენთან ყოფნასა! ნასწავლი კა-
ცი რომ მაგას ამბობ, მაშ ჩემისთანა უსწავლელმა რაღა უნდა თქვას?

სოლიკო. შენც ის უნდა თქვა, რასაც მე ვამბობ!.. თორემ
სულ ეს ტირილი და სულ წუწუნი უკვე მოგვბეზრდა...

ნიკალა. შე დალოცვილო, რასაც შენ ამბობ, მტერსაც ევ უნ-
და...

(სცენაზე გამოდის ფრაკში გამოწყობილი კონფერანსიე.)

კონფერანსიე. პატივცემულო ბატონებო და ქალბატონე-
ბო! ვიწყებთ მეორე განყოფილებას და აი ეხლა თქვენ იხილავთ
ცეკვის ჯადოქარს, ჩვენს შესანიშნავ ფრანგ სტუმარ ქალს — მად-

გუაზელ მარგარიტას! გთხოვთ მიესალმოდეთ! (კულისებისაკენ მიბრუნდება და ტაშს უკრავს. ორკესტრი „ტუშს“ ასრულებს. სცენაზე გამოდის ოქროსკულულებიანი, მეტად ლამაზი სახის ახალგაზრდა მსახიობი ქალი. ერთ ხელში ვარდი უჭირავს, მეორეზე — დიდი მარაო აქვს ჩამოხმული. მარგარიტა თავს უკრავს დამსწრეთ, რომლებიც მხურვალე ტაშით ეგებებიან).

გ ა მ ხ დ ა რ ი ვ ა ჯ ა რ ი. ვაა, მართლაცდა ძალიან შახიანი რამა ყოფილა...

ჩ ა ს უ ქ ე ბ უ ლ ი ვ ა ჯ ა რ ი (მჯილს ჩაიცემს გულში). უჰ, შენ გენაცვალე!

კ ო ნ ფ ე რ ა ნ ს ი ე. დღეს პირველ ნომრად მადმუაზელ მარგარიტა შეასრულებს ამჟამად მეტად გავრცელებულ და მოდურ ცეკვას — „ოი-რა, ოი-რა!“ (ტაში.) გთხოვთ, ქალბატონო!.. (ორკესტრი ასრულებს „ოი-რას“, მარგარიტა მღერის და ცეკვავს.)

ნ ი კ ა ლ ა (გაშტერებული შეჭყურებს). უჰ, რა კარგია ეს დალოცვილი... სოლიკო!.. ნუთუ ესეც იმნაირია, ჰა?

ს ო ლ ი კ ო. არა მგონია!..

ნ ი კ ა ლ ა (გახარებული). მართლა, სოლიკო?! მეც ასე ვფიქრობ...

ს ო ლ ი კ ო. შე კაი კაცო, განა აქ ყველა ისეთია... ამგვარ „ვარსკვლავს“ ეგეთ რასმე ვერც შეჰკადრებენ... მაგას საგანგებოდ ექნება ჩაწერილი თავის კონტრაქტში, რომ სტუმრებთან სულაც არ გამოვა და არ იარშიყებს, როგორც ამას სხვა ქალებს ავალდებულებენ...

ნ ი კ ა ლ ა. დასწყევლა ღმერთმა!.. ეს რა მომდის. რაღაც ციურ არსებად მეჩვენება... (შამპანურს გადაკრავს).

ს ო ლ ი კ ო. (იცინის). ეე, შენ რაღაც სხვანაირად ლაპარაკობ!.. ბიჭო ნიკალა, გულში ხომ არ ჩაგივარდა ეს ფრანგი ქალი მაგ პატრიოტ კაცს?!.

(მარგარიტა ცეკვას ამთავრებს, ხოლო დამსწრენი მხურვალე ტაშით აჯილდოებენ. გაისმის წამოძახილები: „ბრავო!“ მარგარიტა თავს უკრავს და კულისებში გარბის.)

კ ო ნ ფ ე რ ა ნ ს ი ე. ბატონებო და ქალბატონებო!.. მადმუაზელ მარგარიტა უღრმეს მადლობას მოგახსენებთ და მეორე ნომრად შეასრულებს „ხაბანერას“, კომპოზიტორ ბიზეს ოპერა „კარმენიდან“... გთხოვთ, მადმუაზელ!..

(ცვლავ ტაში. ორკესტრი ასრულებს „ხაბანერას“. მარგარიტა გამოიბის, მღერის და ცეკვავს. ნიკალა მთვარეულივით წამოღგება და სცენისაკენ მიდის... მარგარიტა შეამჩნევს მას და მომაჯადოებელი ღიმილით გადმოუგდებს ვარდს, რომელსაც ნიკალა დაიჭერს და გულში ჩაიკრავს. ჩასუქებული ვაჟარი ამის დანახვაზე წამოიჭრება და ნიკალას შეუტევს.)

ჩასუქებულ ვაჭარი. შენ ეი! შენს ადგილზე დაეგდე, თორემ... სხვისა ნაჭერზე თვალები ნუ გაგიჭყეტია!

ნიკალა (მრისხანედ შეუბღვერს). ვის ეძახი „ნაჭერს“, შე ბაჯაჯღანავ! შენ თვითონა ხარ ქონის ნაჭერი! ეს კი ციდან ჩამოსული ანგელოზია...

გამხდარი ვაჭარი. მამა გიცხონდა, ჯერ არავის არ უპროშტნია!..

(ხარხარებს.)

ჩასუქებულ ვაჭარი (ნიკალაზე იწევს). ვინ არის ბაჯაჯღანა, შე აყლაყუდავ!

ნიკალა. ხელი გამიშვი! ხმა ჩაიკმინდე, თორემ თუ ეს ხუთფუთიანი მოგდე ე მაგ მოგრეხილ ცხვირში...

(მუშტს მოუღერებს, მაგრამ სოლიკო და გამხდარი ვაჭარი მისცივიდებიან, აშველებენ. ატყდება აყალმაყალი, რომლის დროსაც ერთ-ერთი ლოჯის ფარდა გადაიწვეს და გამოჩნდება განრისხებული პოლკოვნიკი.)

პოლკოვნიკი. ეს რა უმსგავსობაა!.. ეს რა ღრიანცელია!.. (სოლიკოს.) ბატონო პოდპორუჩიკო!..

სოლიკო (გამოეჭიმება). გისმენთ, ბატონო პოლკოვნიკო!

პოლკოვნიკი. ეხლავ გაყარეთ აქედან ეგ უზრდელი, ეგ მხეცი ტუხემცები...

სოლიკო. მესმის, ბატონო პოლკოვნიკო!..

(სინათლე ქრება და კვლავ აინთება. უკვე გვიანი ღამეა. უკანასკნელი სტუმრები დარბაზს ტოვებენ. ოფიციანტები ჭურჭელსა და ავეჯს ალაგებენ. დარბაზში ფრთხილად შემოდის ნიკალა და ერთ-ერთ მაგიდას მიუჯდება.)

ოფიციანტი (ნიკალას). ბატონო! დარბაზი უკვე იკეტება...

ნიკალა. ეგ მეც ვიცი... მაგრამ აქედან ფეხს არ მოვიცვლი, ვიდრე ის ქალი არ გამოვა...

ოფიციანტი. ვინ ქალი, პატივცემულო?

ნიკალა. აი 'ის მოცეცვავე და მომღერალი ფრანგი ქალი...

ოფიციანტი. მადმუაზელ მარგარიტა?... ჰოო!.. ის, ბატონო, მალე გამოვა... სწორედ აი ასე გამოივლის თავის მზრუნველთან ერთად.

ნიკალა. თუ ძმა ხარ, იქ, ბუფეტში, ყვავილები არაფერი გაქვთ?..

ოფიციანტი. რამდენიც გნებავთ!.. საკუთარი საყვავილე გვაქვს.

ნიკალა. ჰოდა, მთელი ის ყვავილები აქ მოიტანე... აი აქ, გზაზე დაუფინე... ერთი საუკეთესო თაიგული კი მე მომაწოდე...

ოფიციანტი (გაოცებული). ყვავილები აქ დავუფინო?... რასა ბრძანებ, პატივცემულო!

ნიკალა. დალოცვილო, რა გაიოცე? აჰა ფული!... ამაზე მეტი ხომ არ ეღირება?..

ოფიციანტი (გახარებული, ფულს ჯიბეში იკრავს) არა, ბატონო!.. ეს ბევრიც არის!.. (გარბის და შემოაქვს უამრავი ყვავილი, რომელსაც დარბაზის იატაკზე მოაბნევს გასასვლელ კარამდე, ხოლო ვარდების დიდ თაიგულს ნიკალას მიაწვდის. შემოდის მარგარიტა მადამ ლილის თანხლებით.)

ნიკალა (ოფიციანტს კვლავ ფულს ჩაუდებს ხელში). გასწი, ეხლავე ეტლი მომგვარე...

ოფიციანტი. ამ წუთში, ჩემო ბატონო! (გარბის. ნიკალა კვლავ მთვარეულივით გაეშურება მარგარიტასაკენ, თაიგულს მიართმევს.)

მარგარიტა. ოჰ, ეს რა არის?

ნიკალა. ჩემი გულივით უმანკო ვარდების თაიგული, ქალბატონო!.. და ეს თქვენი გზაც ვარდებით არის მოფენილი...

მარგარიტა (ნასიამოვნები, გაკვირვებით). ოო, ეს რამდენი ყვავილებია!.. მე მხოლოდ ერთი ვარდი გაჩუქეთ...

ნიკალა. და იმ ერთ ვარდში ამიერიდან მე მთელ სიცოცხლეს თქვენ განაცვალებთ...

(მადამ ლილი რაღაცას უჩურობს მარგარიტას.)

მარგარიტა. დიახ, მადამ ლილი, თქვენ მართალი ხართ!.. გვიანია და ეტლი დავიჭირავოთ... (ნიკალას.) ნახვამდის, მუსიე...

ნიკალა.. ქალბატონო, ნუ შეწუხდებით... ეტლი უკვე შეკვეთილია...

მარგარიტა (ცნობისმოყვარეობით ჩაათვალიერებს). აჰ, უკვე? დიდად გმადლობთ ყურადღებისათვის... მაგრამ იქნებ ეგ უკვე ზედმეტია, ჰა?..

ნიკალა. რას ბრძანებთ, ქალბატონო!.. ნება რომ დამრთოთ, აი ასე ხელში აგიყვანთ და თქვენს ბინამდე ისე მიგიყვანთ!

მარგარიტა (გადაიკისკიკებს). ოო, სე ტლე ბიენ!.. მე თქვენში რაღაც რაინდულს ვხედავ... მგონი, წელანაც თქვენ გამოესარჩლეთ ჩემს ღირსებას და პატიოსნებას, როცა იმ პირუტყვმა რაღაც შეურაცხყოფა მომაყენა... ფი, კოშონ!.. თუმცა, არც კი ღირს იმაზე ლაპარაკი!.. მე თქვენი დიდი მადლობელი ვარ!

ოფიციანტი (შემოვარდება). ბატონო, ეტლი გელოდებათ!..

ნიკალა (მარგარიტას მდაბლა თავს დაუკრავს). გთხოვთ!.. მობრძანდით, ქალბატონო... (გადიან.)

იგივე შუაბაზარი. ისევ საღამოა. სამიკიტნოდან ამოდის ორი მოხუცი მოქალაქე.

I მოხუცი. ჰო, მართლა! შენ გაიგე, ჩვენს რუსთ ხელმწიფეს კიდევ რა მოუგონია?

II მოხუცი. რა?

I მოხუცი. ტელეფონი!

II მოხუცი. ეგ რაღა დოზანაა?

I მოხუცი. შორიდან სალაპარაკო! კედელზე ერთი ასეთი ხის დოლაბია... ლოროტოტოში ჩასძახებ და იქიდანაც ხელად გამოგძახებენ... მაშ!..

II მოხუცი. ეე, მუდრეგ, ეგ ხომ ტელეგრაფია...

I მოხუცი. აფერუმ შენს საქმეს! ტელეგრაფი მავთულით მუშაობს... აქედან ქალაქს მიაბამენ და სხვა ქალაქში გადააცოცებენ... ეს კი პირდაპირ კაცს ელაპარაკება, მაშ!..

II მოხუცი. ჰო!.. ეს ნასწავლი ხალხი ისე ახირდა, ისეთ საეშმაკო რამეებს იგონებენ, რომ ნახე, თუ ღმერთმა არ დაგვსაჯოს...

I მოხუცი. ეჰ, შენც ლაპარაკობ რაღა!..

II მოხუცი. ჰო, ჰო-მეთქი! აი, ცეცხლის წვიმას რომ მოიყვანს და სულ სოდომ-გომორივით ამოგვბუგავს, მაშინ გაიგებ...

(გაივლიან. შემოდის ჩიხტიკოპიანი დედაკაცი კალათით. წინ ლოთი მეშუშე გადაუდგება.)

მეშუშე. ჰა, დედი, ეს ალმასი იყიდე... აბაზად მოგცემ... ოჯახში დაგჭირდება...

დედაკაცი. არა, შვილო, აბა მე რომელი მეშუშე მნახე... ბაზაზი (დუქნიდან გამოდის). მაშ ჩემს დუქანში შემობრძანდი. რა გინდა, დედი, რომ მე არა მქონდეს... ჩითი, მიტკალი, ქიშმიჩი, დარაია... სულ ზაგრანიცული...

დედაკაცი. მოიცა, შვილო, კალთები ნუ დამაგლიჯე... ხორცი უნდა ვიყიდო...

ყასაბი (გამოდის თავის დუქნიდან). მაშ ჩემთან მობრძანდი, დედი! რა მოგართვა? ღორის სუკები თუ ძროხის ჯალაღაჯი?..

დედაკაცი. მოიცა, ქა... ნუ ვადამაოგნეთ დედაკაცი! სტეპკუასთან მივდივარ, შვილო, იმის მუშტარი ვარ...

ყასაბი. ვაჰ, სტეპკუას საქონელს რა — ოქროები ასხია?! ხორცი ხორცია...

დიმიტრა (გამოდის დუქნიდან). დედიჯან, ყველის ყიდვა არ დაგავიწყდეს...

დედაკაცი. არ მინდა, შვილო...
დიმიტრა. მაშ კარაქი წაიღე... კატლეტების მოსახრაკავად
ლაჭირდება.

დედაკაცი. იპ, ქაა... კატლეტებს კარაქზე ვინა ხრაკავს!

დიმიტრა. აბა მაშ რაზე?

დედაკაცი. ერბოზე, შვილო, ერბოზე...

დიმიტრა. მაშ მობრძანდი, ერბო წაიღე... რამდენი აგიწონო?

დედაკაცი. არ მინდა, შვილო... სახლშიც ბევრი მაქვს...

დიმიტრა. მაშ ეს ორი ქილა მაწონი უნდა წაიღო! ჰაა, კამე-
ჩის მაწონია. ბუილა მაწონი ხომ გაგიგონია... აბა, შეხედე... (ქი-
ლებს გადმოაბრუნებს.) შენს ხანში ვახშმად მაწვნის ჭამა პირდაპირ
წამალია.

დედაკაცი. არა, შვილო, არა! (წასასვლელად გაიწევეს).

დიმიტრა. ეე, მოიცა, დედი... ეს ერთი ქილა მაინც უნდა
წაიღო... მერე შენვე მეტყვი მადლობას.

დედაკაცი. გეთაყვათ! ასეთი ძალადობა გაგონილა?!

დიმიტრა. ჩემმა მზემ, შენ რომ გიყურებ, ცხონებული დე-
დაჩემი მაგონდება... საწყალი, ისიც შენსავით ასეთი ეშხიანი და
შნოიანი დედაკაცი იყო. (ქილას კალათაში ჩაუდებს.)

დედაკაცი. ქაა!.. ყაჩაღობაა!..

დიმიტრა. ვაპ, დალოცვილო!.. რა ძალიან ინაზები! ოღონდ
წაიღე და შენი ფული სულაც არ მინდა... ერთი დახედე, რა მაწონ-
ია!.. ჩემმა მზემ, რომ გატან, თან მენანება...

დედაკაცი. ქაა, ეს როგორ? ჩემ სიცოცხლეში მუქთად არა-
ვისგან არაფერი არ წამიღია.

დიმიტრა. ჰოო?... მაშ თუ ეგრეა, მოიტა ერთი საწყალი სამ-
კაბიკიანი და...

დედაკაცი. (უილაჯოდ, სასომიხდილი). შვილო და ძმაო!
ოღონდ გამიშვი, ოღონდ გამატარე და აჰა, შაურს მოგცემ... შენი
ხურდა არ მინდა... ვითომ გლახისთვის მიჩუქებია.

დიმიტრა (ფულს გამოჰგლეჯს). აი ავაშენოს!.. (კვლავ შემ-
პარავად.) დედი! მოდი, ბარემ ორკაბიკიანიც დაუმატე და ეს მეო-
რე ქილაც წაიღე, ჰა?..

დედაკაცი. აი, დაგწყევლოს ღმერთმა!.. არა, შვილო, არა!
(საჩქაროდ გადის.)

დიმიტრა. არა-მარა და დარღუბალა! (შემოდის დიმიტრას
ცოლი სონა, ხელჩაკიდებით მოჰყავს თავისი 7—8 წლის ვაჟიშვილი
გოგია, რომელიც ძალიან ჰგავს ფიროსმანის სურათს „მდიდარი კინ-“

ტოს შვილი“. მათ შემოსდევს ვარინკა — დიმიტრას ობოლი დის-
წული.) ვაჰ, შე ოხერო, სადა ხარ აქამდის?

სონა. ვიშ, ქაა! იმდენ საზიდალს შინ მიტანა არ უნდოდა.

დიმიტრა. აი, ეს ერთი მაწონილა დამრჩა... დილამდე დამტყავ-
დება. წადი ჩამოატარე... იქნებ როგორმე გაასალო...

სონა. აბა ეხლა ვის მივაჩეჩო... მაგასაც ჩვენი გოგია შეჭამს...
აჰა, შვილო, ჭამე, მიირთვი, დედა გენაცვალოს... (გოგია ქილას ჩა-
მოართმევს და თითით ტლეკავს) გოგო, ვარინკა! დუქანში შეიყვა-
ნე, კოვზი მიეცი...

დიმიტრა (ვარინკას). მერე საქონელი სარდაფში ჩაიტანე...
დუქანი დაგავე. (ვარინკა და გოგია დუქანში შედიან.) შენ კი აი ეს
ფული მაგ კაბის ჯიბეში დამალე სადმე... ის ტვინდასეტყვილი თავ-
ზე არ წამოგვადგეს...

სონა. ქაა, ნუთუ ვერაფერს ატყობს...

დიმიტრა. აბა რა ჭირს შეატყობს? სულ იმ ბალახზე გორა-
ობს ბანზე და ცას გაჰყურებს... თხუპნის და ჯღაბნის... თუ არადა
სულ ქეიფობს... დახლში დგომა ეთაკილება...

სონა. კი, მაგრამ... რომ გაგვიგოს?

დიმიტრა. ქალო, რას გაგვიგებს, რას?.. გუშინ ამ დროს რომ
იმ ახალგაზრდა ოფიცერს გაჰყვა, აი ჯერაც არ დაბრუნებულა... აბა
მითხარი, ეს საქმეა?!

სონა. იშ ქაა... ცოტა ხათრი მაინც გავუწიოთ! ჩვენი გოგიას
მომნათვლელია...

დიმიტრა. რის ხათრი, დედაკაცო! ეგ დაქეიფობს და მთელი
დუქანი კი ჩემს კისერზეა... ხათრი კი არა, მე მინდა ეგ სულ ავბარ-
გო... სულ ცარიელზე უნდა გავიყვანო...

სონა. ქაა, ეგ როგორ?

დიმიტრა. მე ვიცი, როგორც! უკვე „პლანები“ დაწყობილი
მაქვს.

სონა. უიმე... მეშინიან! ხალხი რას იტყვის?!

დიმიტრა. რაც უნდათ, ის თქვან... ჩვენ თუ არ ვუზამთ, სულ
ერთია, სხვა ისარგებლებს მაგის ბედოვლაობით... ჰოდა, ლუკმა
გავარდეს, ჯამში ჩავარდესო... ჩვენზე უფრო უპრიანია...

სონა. მაინც, რას უპირებ?

დიმიტრა. იჰ!.. მაგას რა უნდა!.. ორი-სამი ყალბი ვექსილი,
ცოტა ქრთამი და ხელად ქუჩაში გავაპანლურებ...

სონა. დამიდგეს თვალი... მაგისთანების ძალიან მეშინიან... მო-
დი, ჯერ იცი, როგორა ვცადოთ...

დიმიტრა. როგორ?

სონა (შემპარავად). ჩვენ რომ ეგ ხელში მაგრად მოვიგდოთ, აღარც მაგდენს იქეიფებს და სულ ჩვენს ჰკვაზედაც ვატარებდით... დიმიტრა. კი, მაგრამ როგორ?

სონა. როგორ და, ეგ რომ დაცოლშვილდეს... ხათრიანი, რბილი კაცია...

დიმიტრა. ეებს!.. მაგაზედ ეგ სულაც არ ფიქრობს.

სონა. ჩვენ უნდა ვაფიქრებინოთ... უნდა შევუჩინდეთ... უნდა შევერთოთ...

დიმიტრა. ვინა?

სონა. აი ეს შენი დისწული... ხომ ხედავ, ხელში შემოგვაბერდა. როდემდის უნდა ეგდოს ჩვენთან ასე სამადლოდ. იცი, რამდენსა სჭამს...

დიმიტრა. ბიჭოს, ეგ კარგი გიფიქრია... მართლაცდა, ეგ რომ დაგვისიძევდეს, სულ აი ასე ხელთ მეყოლება... მაშინ ჯღაბნოს რამდენიც ნებავს, მე კი ვივაჭრებ... მთელი დახლი ჩემს ხელთ იქნება...

სონა. ჰოდა, მეც მაგას გეუბნები. ჩვენც აქ გადმოვალთ... ყველაფერი ერთ ოჯახში დატრიალდება...

დიმიტრა. მაჭანკალი მივუგზავნოთ?..

სონა. იჰ, მაჭანკლების ფული სად არის! შენ აქ არა ხარ... რის გერიდება?

დიმიტრა. ამ გოგო ვარინკამ რომ იუაროს?..

სონა. ჰმ, იუაროსო?.. ჭაა, რომ იცოდე, სხვაზე არავისზე კი არ უყაბულდება ეგ სასიკვდილე!.. აი გუშინაც სლესარ ვანუამ მომიგზავნა ჩვენი პელაგო და...

დიმიტრა. ვაჰ, მეტი რა უნდა...

სონა. იჰ, მაგისტანებს კი არ კადრულობს ეგ დასაბრმავე-ბელი.

დიმიტრა. აბა მაშ სიკვდილამდე მე ხომ არ ვაჭმევ... მალე გათხოვდეს, თორემ მაგასაც ისეთ პანდურს ამოვკრამ, რომა...

სონა. მაშ რაა!.. ჩვენს შვილს დავაკლოთ და მაგანა ხეთქოს ჰოდა, ამ დილას სიტყვა გადავუკარი ამ ბედოვლათზე და უნდა გენახა, როგორ გაწითლდა... ჭაა, ენა დაება, კარში გავარდა.

დიმიტრა. უყურე შენა!.. ეტყობა, გულში ჩავარდნია...

სონა. მაშ, ჭაა!.. მეც სწორედ ეგრე დავკარი აზრი და იმიტომ ვკოთხე...

დიმიტრა. როგორ შეატყე?

სონა. ამას წინათ შუალამისას გამომეღვიძა და მესმის — ტირის. ყური მივუგდე და მაგის სახელს ახსენებდა... ძილში ბოდავდა. (გარედან მოისმის მოახლოებული დაფა-ზურნის ხმა და ნიკალას სიმღერა. დიმიტრა და სონა ყურს აქვეტენ.)

დიმიტრა. ოჰო, მობრძანდება ჩვენი ტვინდასეტყვილი!..
სონა. აბა, როგორც კი დრო იხელთო, სიტყვა ჩაუყარ...
(მხიარული ყრამულითა და სიცილით შემოდინ ნიკალა და მისი მეგობარ-
ამფსონები: ბეგო, სერგო და გეო, მათ მოსდევენ მეზურნეები და მედოლე.)
ნიკალა (მღერის).

შენ გადიღებ,
შენ გიგალობ,
შენი რწმენის ბერი ვარ,
რა დღიდანაც ვაგვიცანი,
ჩემი თავის მტერი ვარ...
დავალ ეშხით მოხიბლული,
მარტო შენზედ ვმღერივარ,
ფირსმანი შენ მოჰკალი,
ცოცხლად მკვდრებში ვწერივარ.

(დიმიტრას გადაეხვევა.) ჰაა, დიმიტრაჯან! შენ გენაცვალე.. რა აღ-
მაცერად გამომცქერი!? ხომ არაფერი გაწყენინე?

დიმიტრა. არა, ძმაო, არა!.. პირიქით, ძალიან მიხარიან, რომ
ასეთი მხიარული ხარ...

ნიკალა (სონას დაინახავს). ოო, ნათლიდედ!.. შენც აქ ბრძან-
დები?.. შენი ჭირიმე!.. (მოეხვევა, ჯიბიდან ბლომად ფოჩიან კამფე-
ტებს ამოიღებს და კალთაში ჩაუყრის.) ეს კამფეტები ჩემს საყვა-
რელ ნათლულს, შენს ხუჭუჭქოჩორა გოგიას მიართვი... (ფანჯარაში
გოგიას დაინახავს.) ბიჭოს, ესეც აქ არის? შენ შემოგვევლოს ძია
ნიკალა!.. აჰა, აჰა, კამფეტები! ჭამე, მიირთვი!.. უფრო გასუქდი...
(ვარინკას მოჰკრავს თვალს.) ოჰო, ჩვენი მოლულუნე გვრიტი ვარინ-
კაც აქა ყოფილა?! შენი ჭირიმე... მაჰატიე!.. აჰა, ესეც შენ... ჰა, გა-
მომართვი... ნუ გრცხვენინან... (ფანჯარაში კამფეტებს აწვდის, შემ-
დეგ კვლავ დიმიტრას მოუტრიალდება.) ჰაა, ნათლიმამ... რას მოგი-
წყეხია! აბა ერთი ეს ყანწი დამიცალე და მერე მე და შენ ერთი
ჩვენებური, მირზაანული უნდა ჩამოვუაროთ... იცი, ჩემს გულში
დღეს რა ვეება სიხარულია!.. (ხელებს გაშლის, ამფსონები ტაშს
აყოლებენ. გამვლელები შედგებიან და უყურებენ. დუქნიდან მე-
დუქნეები გამოდიან.)

ბაზაზი (თვალს ჩაუყრავს დიმიტრას). ვაა, რა კამპანიონი
გყავს! არც მოგაწყენს, არც გაგამდიდრებს!

დიმიტრა (კუშტად). გინდა დაგიომო!?

ბაზაზი. არა, ძმაო, არა! ღმერთმა მშვიდობაში მოგახმაროს.

ნიკალა. ჰა, ნათლიმამ!.. გამო, იცეკვე... შე კაი კაცო, შუბლი
გამიხსენ!..

ბეგო (წრეში გადმოხტება). ჰაიტ! ეხლა კი ერთი ბალდადური, თორემ გავგიჟდი! აბა, ბიჭებო! (მეზურნეები ბალდადურზე გადადიან, ნიკალას ამფსონები ბეგო და გეო ბალდადებს გაშლიან, ჩამოუვლიან. საერთო სიმხიარულე და ყიჟინა. მოისმის გოროდოვოის საგანგაშო სტვენა.)

გოროდოვოის ხმა. ჰა, გათავდა ბაზარი! აალაგეთ საქონელი! ეჭვი, მანდ რა ამბავია!..

(კვლავ სტვენა, ხალხი თანდათან იშლება.)

ნიკალა (მეგობრებს). იცოცხლეთ, ძმებო!..

ბეგო. ნიკალაჯან, მაშ მე ხვალ დილით ჩამოგივლი და ჩამაკარტიჩე! ჰა?

ნიკალა. ისე დაგხატო, რომ...

ბეგო. შენ გენაცვალე! აბა მაშ ეხლა კი კარგად იყავი!.. სულ ასე გახარებული და ბედნიერი გატაროს ღმერთმა! (კოცნის.)

გეო. ნიკალაჯან! თუ რამ დაგჭირდეს, არ მომერიდო! (კოცნის.)

სერგო. ძმაო, გაცოცხლოს და ისე გაბედნიეროს, როგორც ეგ შენი გული შეგთხოვდეს!.. (კოცნის.)

ნიკალა. დიდი მადლობა, მეგობრებო!.. თქვენც იღლეგრძელეთ!

ბეგო (ჯამს აივსებს). ეს სულ ბოლოსაც გაუმარჯოს მათ, ვინც აი ეხლა ჩვენს ოჯახში სანთელს ანთებდეს და თანაც თვალი გზისკენ სწყდებოდეს, ის ყურუმსალი ჩემი ქმარი როდის მოვაო...

სერგო. ყოჩაღ, ბეგოჯან! ეგ კარგადა სთქვი!

გეო. მაშ ეს ჩვენს ცოლ-შვილს გაუმარჯოს!

ბეგო (მეზურნეებს). შენ დაუკარ!

(მეზურნეები უკრავენ, მეგობრები კვლავ კოცნიან ნიკალას და წასასვლელად დაიძვრებიან. ბეგო მღერის, სხვებიც ხმას აყოლებენ.)

ღლე ნიადაგ
ოჯახს ვუვლი,
შვილებისთვის
გადამკვდარი...
სალამოს კი
ქმარს მოველი
სანთელივით ჩამომდნარი...

(შემოდის ახმახი ტანის გოროდოვოი პროხორი სტვენით.)

პროხორი. რაზოიდის!.. დაიშალენით!.. დაკეტეთ ღუქნები!..

(სტვენითვე გადის. ნიკალა ამფსონებს მიაცილებს.)

დიმიტრა (სონას). ხედავ, რა ამბავშია! მაგას თუ დროზე არ მოვუარეთ...

სონა. ტსს... აგერ, მოდის! ამ გოგოზე ბარემ ეხლავე უთხარ... ნასვამია და უფრო ადვილად დაგყაბულდება. (ღუქანში შედის, შემოდის ნიკალა ღიღინით.)

ნიკალა. ჰა, ნათლიმამ! შენ ისევ სახე ჩამოგტირის? ავად ხომ არა ხარ?

დიმიტრა. არა, არა...

ნიკალა. მა, ღუქანში ხომ ცუდი არაფერია?

დიმიტრა. ეჰ, ამაზე ცუდი რა იქნება... დღეს ვაჭრობა სულ არ იყო... კაბიკი არ შემოსულა... თავგებსაც ორი თავი ყველი შეუქამიათ.

ნიკალა. შე კაი კაცო! მერედა მაგაზედ რა გაბოღმებს... ხვალ ბევრს ვივაჭრებთ... იმ ყველის ფასსაც ხელად ამოვალთ...

დიმიტრა. მე ის მამოღმებს, რომ შენ სულ ხატავ... ანდა მთვრალი დადიხარ...

ნიკალა. უკაცრავად, მე მთვრალი არა ვარ!..

დიმიტრა. აბა მაშ რა ხარ?

ნიკალა. ზარხოშადა ვარ! ლამაზ ეშხზე ვარ!.. უჰ, გული მიმღერის, ყველა მიყვარხართ!..

დიმიტრა. ჰოდა, მაგ შენს ზარხოშობაში ბევრ ფულსა ხარჯავ!.. ასე სულ მალე გავკოტრდებით...

ნიკალა (მოიღუშება). დალოცვილო! მე ჩემსას ვხარჯავ, შენსას ხომ არა!

დიმიტრა. მე მაგაზედ კი არ გეუბნები... შენ ქეიფობ, ხატვით გულს ირთობ... მე კი აქ ფეხზე დგომით ჩამოვწყდი კაცი...

ნიკალა. მოკლედ, მაყვედრი? დალოცვილო, ეს ღუქანიც და თანხაც ჩემია... შენი მხოლოდ ფეხზე დგომაა... კანონით ორი წილი მე მეკუთვნის, ერთი კი შენა... მე კი მოგებას უშაზე გიყოფ... მეტი რა გინდა?..

დიმიტრა. ეგ მართალია... მადლობელი ვარ, მაგრამ...

ნიკალა. რა მაგრამ?

დიმიტრა. მაინც აქ უნდა იყო... იქნება გპარავ? იქნებ გატყუებ? ვილაც რაღაცას ჩაგჩურჩულებს და... ხომ იცი შენი ხასიათი...

ნიკალა (კვლავ მხიარულად გადიხარხარებს). აჰ, შენ ეგ გაწყუხებს? არა, ნათლიმამ... მე შენ გენდობი! ჩემი ღუქანი, ჩემი თანხა, ეს ჩემი სულიც — სუყველაფერი შენს ხელშია და რომ სინდისზე ხელი აიღო, სულ გამაკოტრებ, მაგრამ ვიცი, რომ ამას არ იზამ!..

დიმიტრა. მოიცა... ეს ოხერი, სულ სხვა რამის თქმა მინდოდა...

ნიკალა. რის თქმა?

დიმიტრა. აი იმ ბეგოს სადღეგრძელოზე მომაგონდა... შე კაი კაცო, ყველასა ჰყავს ცოლი, შვილები... და შენ კი ასე ყარყუმივით რად უნდა იყო?..

ნიკალა (ღიმილით). მოკლედ მოსჭერი, გულში რა გიდევს?

დიმიტრა. აი რა: მოდი, ცოლი შეირთე!.. ოცდაათი წლის ვაჟაკი ხარ... სულით სპეტაკი, პატიოსანი, ჯან-ღონით სავსე... თანაც ნათესავ-მახლობელი არავინა გყავს...

ნიკალა (გადიხარხარებს). ყოჩაღ, ნათლიმამ!.. ჯერ მაძაგე და ეხლა მაქებ?! ალბათ საპატარძლოსაც ამომირჩევდი...

დიმიტრა (ცბიერად ჩაიღიმებს). აბა მაშ როგორ...

ნიკალა. მაინც, ვინ არი?

დიმიტრა (საიდუმლო კილოთი). პირდაპირ გეტყვი... მეც და სონასაც ისე გვიყვარხარ, რომ ძალიან გვინდა დაგისიძევოთ!..

ნიკალა (გაოცებული). ეს რანაირად?

დიმიტრა. ძალიან გვინდა, რომ შეერთო აი ის ჩემი დისწული... ხომ იცი, რა პატიოსანი და გამრჯე გოგოა...

ნიკალა. აჰ, ვარინკა?! (ჩაფიქრდება.) ჰმ, ვარინკა მართლაც ძალიან სათნო ქალია, მაგრამ...

დიმიტრა. მაგრამ რა?

ნიკალა. მეც გულახდილად გეტყვი, ნათლიმამ! (აღტაცებული ღიმილით.) მე საოცნებო მზეთუნახავი უნდა შევიერთო, როგორც მხოლოდ ზღაპრებში არი...

დიმიტრა. დალოცვილო, რა დროს ხუმრობაა...

ნიკალა. მე არცა ვხუმრობ! (ხელს მოხვევს.) ჩემო დიმიტრა, შენ რომ იცოდე, ეხლა ჩემს გულში რანაირი ცეცხლი ბრიალებს... აღარც კი ვიცი, როგორ აგიხსნა... აი, მე დღეს ისეთი ბედნიერი ვარ, რომ ასეთ რამეს არც კი მეტყოდით...

დიმიტრა. ბიჭოს, ეგრე რამ გაგაბედნიერა?.. ჰა, შენ რაღაც სხვანაირად ლაპარაკობ!..

ნიკალა. არ ვიცი, არა!

დიმიტრა. ბარემ მითხარი!

ნიკალა. არა, არა!.. ჯერ ვერ გეტყვი... (შემოდის მეეზოვე კიბით, ქუჩის ფარანს ანთებს. მის დანახვაზე ნიკალა შეკრთება.) უჰ, უკვე ღამდება?.. მაშ, მოდი, დღესაც მაპატიე, ჩემო დიმიტრა, და ხვალ დახლში მე დავდგები, შენ იქეიფე!.. (წასასვლელად გაიწევის.)

დიმიტრა. სად მიხვალ, ბიჭო?..

ნიკალა. გორგიჯანოვის ბაღში მივრბივარ... მელოდებიან...

დიმიტრა. მოიცა, კაცო! შენი ღუქანი შენ დაკეტე... ეს დახლიც ჩაიბარე...

ნიკალა. არა, არა.. რა დროს ეგ არის... ძალიან მეჩქარება... შენ დაკეტე... ეგ დახლიც ხვალ დავთვალოთ... (კვლავ მოეხვევა და გადაკოცნის.) ჩემო დიმიტრა, ხომ გითხარი, სულით ხორცამდე გენდობი-მეთქი და აბა, შენ იცი!.. (მირბის. ღუქნიდან გამოდიან სონა, გოგია და ვარინკა ნაკრაულებით. დიმიტრა ღუქანს კეტავს.)

სონა. ხედავ, რას სჩადის ეგ თავმკვდარი!.. ეტყობა, ისევ საქეიფოდ გაინაგარდა.

დიმიტრა. მერე სად? გორგიჯანოვის ბაღში, სადაც სულ მსხვილ-მსხვილი ბობოლეები დროს ატარებენ!

სონა. იი, ჩამიხმეს მაგისი თავი... კუმ ფეხი გამოჰყო, მეც ნახირ-ნახირო... ისე კი გახლავს გამოპრანჭული, რომ ვერც შეატყობენ, რომ უბრალო მეღუქნე არი...

დიმიტრა. მე კი გულზე იმიტომ ვსკდები, რომ მაგ ტვინდასეტყვილმა ამ გოგოზედ უარი მტკიცა... მაგის თავს აშკარად რაღაც ამბავია...

სონა. მაშ ქაა!. ფანჯრიდან ყურს გიგდებდით... თურმე, ბატონო, ციდან ჩამოფრენილ ანგელოზს ელის!.. აი, მიწამ კი ჩაიტანოს მაგისი თავი! ეგ უბედური რაებს როშავდა...

დიმიტრა (ღრძოდ და ბოროტად). რაკი ეგრეა, მაშ ეხლა შე ვიცოდე, რასაც დავმართავ... თუ ეგ ძალღივით ქუჩაში არ გავადო, ეს უღვაშები დამაგლიჯე!..

ვარინკა (იცრემლება, თავისთვის). ღმერთო ჩემო!.. რას, რას ერჩიან!..

სონა (ვარინკას). შენ ეი, გოგოვ, რას იცინგლები... შე ყეყეჩო, უნდა გიხაროდეს, რომ უარი თქვა, თორემ ეგ ისეთი ტვინნალრძობია, რომ ცოცხლივ დაგმარხავს...

დიმიტრა. კიდევაცა!.. შენც აილე და მაგის ჯიბრზედ ვანუას გაჰყევ! (სონას.) დედაკაცო! ხვალვე შეუთვალე, ბელგა-ნიშანი მოიტანოს...

ვარინკა (გადაჭრით). მე სხვას არ გავყვები!

დიმიტრა. რაო? როგორ თუ არ გავყვები?!

სონა. იჰ, ისე გავყვები, რომ მზე მალლა იყოს!

ვარინკა. არა-მეთქი! არ გავყვები!.. ვთქვი და ეგრეა!..

(ტირილს უმატებს.)

დიმიტრა (მუშტს წაუტიალებს). ხმა ჩაიწყვიტე!.. შენ ვინა

გკითხავს... შე მაიმუნო, გათხოვებ და მეტი რა გინდა! კნიაზის შეი-
ლებს არ აძლევენ არჩევანსა და შენ ვინ მიგდიხარ!.. გეუბ-
ნები, ვანუას გაპყევ, თორემ, იცოდე, შემომაკვდები!.. (კიდეც წაუ-
ტიალებს.)

სონა. ჩვენ შენი თავი აღარა გვაქვს... ჩვენი შვილი გვყავს გა-
საზრდელი...

დიმიტრა. ისიც გეყო, რომ იმ უტვინო ჩემი დის ხატრით ათი
წელია ობოლს გინახავ...

სონა. მაშ ქა!.. გაჭმევთ და გაცმევთ... ხუმრობა საქმე კი არ
არის!...

ვარინკა (გულჩათუთქული სლუკუნებს). აღარაფერი არ მინ-
და თქვენი. თქვენი ლუკმა აქ, ყელზე მადგა... არ მინდა!.. სულაც არ
გავთხოვდები...

დიმიტრა. არ გათხოვდები და, რაც მოგივა, შენს თავს მოჰ-
კითხე!.. ისეთ პანჩურს ამოგიჭირებ, რომ... (გაბრაზებული საცემ-
ლად მიიწევს, მაგრამ სონა შეაჩერებს.)

სონა. მოიცა, კაცო... ქუჩაში სირცხვილია... სახლში არ მოვა!

დიმიტრა. მართლაც! მობრძანდეს სახლში!.. იქ ვუჩვენებ...
(სონასთან და გოგიასთან ერთად გადის.)

ვარინკა (ათრთოლებული ხელებით ცრემლს იწმენდს, გულს
იურვებს, რაღაც განწირულებით წელში გასწორდება და თითქოს
ვიღაც უხილავს ელაპარაკება).

ვფიცავ, რაც უნდა მოხდეს,
ისევ შენ მეწამები...
მაინც შენ მეხსომები,
კვლავ შენთვის ვეწამები...
მაინც შენთვის მოვკვდები...
მაინც შენ მეყვარები.

მ ო ქ მ ე ლ ე ბ ა მ ე ო რ ე

ს უ რ ა თ ი მ ე ო თ ხ ე

„ვეტცელის“ სასტუმრო. მარგარიტას ნომერი, რომელიც ორი ოთახისაგან შედგება. სცენა წარმოადგენს ფართო სასტუმრო ოთახს, ხოლო კარის გადაწეულ პორტიერებს შორის მოჩანს მეორე ოთახის ნაწილი და საწოლები. სცენაზე არავინ არის. შემოდის მარგარიტა და ნიკალა.

მ ა რ გ ა რ ი ტ ა (შლიაპას მოიხდის, ხელთათმანებს გაიძრობს). მშვენიერი, შესანიშნავი სამაჯურია... დიდი მადლობა, ჩემო ნიკოლა... მოდი, გაკოცო!.. (შუბლზე კოცნის.) რა მიეცი? ალბათ, ბევრი, ხომ?..

ნ ი კ ა ლ ა. შენ გენაცვალე!.. ხილი მიირთვი! შენ მეხილეს რასა ჰკითხულობ!.. (პიჯაკის ჯიბიდან კიდევ რაღაც შეხვეულს ამოიღებს.) მით უმეტეს, რომ ასე მგონია, არც ამ საჩუქარს დამიწუნებ... (მიართმევს.)

მ ა რ გ ა რ ი ტ ა (გაოცებული და გახარებული). საყურეები!.. ღმერთო ჩემო, რა ლამაზები!.. ჩემო ნიკოლა!.. ჩემს გულში იჯექ?.. სწორედ ასეთი საყურეები მენატრებოდა... (ყურებზე იკეთებს და სარკის წინ კეკლუცობს. ნიკალა კი ახლა სხვა ჯიბიდან ამოაცოცებს პატარა კოლოფს და მოულოდნელად წინ მიაგებებს.)

ნ ი კ ა ლ ა. შენ შემოგევლე... აბა ამაზედ რაღას იტყვი?..

მ ა რ გ ა რ ი ტ ა (კოლოფს გახსნის, ბეჭედს ამოიღებს და თითზე წამოიცვამს). ოო, ეს უკვე მეტისმეტია... დიდი მადლობა, ჩემო ძვირფასო!.. მოდი, ეხლა კი შენ მაკოცე... დღეს ნებას გაძლე... (ლოყას მიუშვერს, მაგრამ ნიკალა აღელდება, უკან დაიწევს.)

ნ ი კ ა ლ ა. არა, ჯერ არა...

მ ა რ გ ა რ ი ტ ა (იცინის). ო, რა მორცხვი და რა უმანკო ხარ... (ეშმაკური ღიმილით პიჯაკის ჯიბეებს უჩხრეკავს.) შენ ეს მითხარი, აქ კიდევ ხომ არაფერი გაქვს?..

ნ ი კ ა ლ ა. რა, კიდევ გინდა? ეხლავ მოგართმევ! (გაიწევს, მაგრამ მარგარიტა შეაჩერებს, გვერდით მოისვამს.)

მარგარიტა. სულელო ნიკოლა! მე ვიხუმრე!.. შენ მეტისმეტად მანებეიერებ... ასე არ ვარგა...

ნიკალა. აბა მაშ როგორ?

მარგარიტა. როგორ და, კვირაში ერთხელ რომ მომართვა თითო ასეთი, ესეც სავსებით საკმარისია...

ნიკალა. ჰმ, დალოცვილო, განა მე მესმის, რას ვჩადივარ... რაც შენ გაგიცან, რაც შენთანა ვარ, რაღაც ალმურის ბურანში ვცურავ...

მარგარიტა (მორთმეულ ბეჭედს დახედავს, გაოცებული). ოჰო, ნიკალა!.. ეს რას ნიშნავს?.. ეს ხომ საქორწინო ბეჭედი, ჰა?

ნიკალა. დიახ!.. ჩემი ნატვრაა — სულ ჩემი იყო... სამუდამოდ, სამარადქამოდ...

მარგარიტა. ესე იგი, ცოლად გამოგყვე? (მხიარულად გადიკისკინებს.) ჩემო ნიკოლა! ოო, როგორი სასაცილო ხარ...

ნიკალა. რაღა ვარ სასაცილო?

მარგარიტა. იმიტომ, რომ მე ხომ კაფეშანტანის მოცეკვავე ვარ...

ნიკალა. მერე რომ?..

მარგარიტა (იციინის). ის, რომ ყველას საყვარლად ვუნდივარ მხოლოდ.

ნიკალა. ჰო, მაგრამ... შენ ხომ...

მარგარიტა. ო, არა, არა! მე ეგეთი ქალი არა ვარ...

ნიკალა. ჰოდა, მე ის მინდა, რომ სულ ჩემთან იყო, რომ აღარსად აღარ წახვიდე...

მარგარიტა. ოო, მაგის პირობას მე ვერ მოგცემ... ძალიან მიყვარს ცეკვა, სიმღერა... დღეს აქ, ხვალ იქა... როგორც პეპელა...

ნიკალა. მე კი სწორედ აი ეგ მტანჯავს... გემუდარები, ქმრად მიმიღე და სადაც შენ წახვალ, მეც იქ წამოვალ...

მარგარიტა. ფი!.. საქმეც სწორედ ეგ არის, რომ შენ თვითონ უნდა წამიყვანო, სადაც მე მინდა...

ნიკალა (გახარებული). ჩემი თავი შენ გენაცვალოს!.. ოღონდ მიბრძანე და, მართალია, ბევრი ფულებით ვერ გაგაკვირვებ, მაგრამ დღესვე გავყიდი, რაც მახადია და სადაც მეტყვი, იქ წაგიყვან...

მარგარიტა. პეტერბურგში! ჰა?! ხომ, ჩემო ნიკოლა!? ანდა პარიზში!..

ნიკალა. სადაც მიბრძანებ! და ყველგან, ყველგან შენი ერთგული მონა ვიქნები...

მარგარიტა. ოო, ეგ არ კმარა... ფულები რომ შემოგელიოს?!

ნიკალა. ყველანაირ შრომას ვიკისრებ, რომ კვლავაც ისე შეგინახო, როგორც შეგფერის... დამიჯერე, ჩემსავით ერთგულს, მთელი დუნია რომ დაიარო, ვერსად იშოვი... ბოლოს და ბოლოს ამ ქვეყანაზე მარტო ეს წყეული ფული ხომ არ არის!.. მე შენ გთავაზობ ამ ჩემს ალალ გულს, ჩემს ზღვა სიყვარულს, მთელ ჩემს სიცოცხლეს... ნუთუ ამას ფასი არა აქვს?...

მარგარიტა. ოო, ჩემო ნიკოლა! ნუთუ მართლა ასე გიყვარვარ?..

ნიკალა (დიდი გრძნობით). დალოცვილო, აქ რა არის გასაკვირველი... მე ხომ შენამდე ჯერ არავინ არ მყვარებია... შენა ხარ ჩემი პირველი სიხარულიც და სიყვარულიცა... შენ ამანთე, შენ ამაფეთქე!.. და აჰა, გიჟად გადავიქეცი... შენს მეტი უკვე აღარაფერი აღარ მახსოვს...

მარგარიტა (კვლავ შუბლზე კოცნის.) ოო, რა მჩქეფარე ტემპერამენტი!.. რა დიდი გრძნობა!.. ჩემო ძვირფასო ნიკოლა!.. რაკი ეგრეა, კმარა ეს თამაში... მოდი, ეხლა კი სერიოზულად ვილაპარაკოთ...

ნიკალა. ბრძანე, შენი ჭირიმე!..

მარგარიტა. მე დღემდის შენთვის არა მიტქვამს რა, მაგრამ რაკი ეს ბეჭედი მომიძღვენი, ეხლა მეც გეტყვი: რაც შენ გაგიცან, გულის სიღრმეში იღუმალად ვგრძნობ, რომ შენ აშკარად რაღაც დიდი მხატვრის ნიჭი გაქვს. და იცი, მე ეხლა რაზე ვოცნებობ...

ნიკალა. რაზედ, ძვირფასო?

მარგარიტა. რომ მე და შენ ან პეტერბურგში, ანდა პარიზში წავალთ და მე იქ ყოველნაირად ხელს შეგიწყობ, რომ სახელგანთქმული მხატვარი გახდე და ჩემი სიცოცხლე სხვა სიხარულით აამეტყველო...

ნიკალა (გრძნობამორევით). შენი ჭირიმე! ნიკალა მოკვდეს, თუ ეგ ნატვრა არ გაგიმართლოს...

მარგარიტა. კი, მაგრამ რამდენჯერ გითხარ, რომ ასეთ ოქროულს სხვაც მომიტანდა... მე შენ რამდენჯერ მიგახვედრე...

ნიკალა. რას?

მარგარიტა. იმას, რომ ჩემთვის შენი სურათი მოგედღვნა რამე... მასზე ძვირფასი საჩუქარი ჩემთვის აბა სხვა რა იქნება.

ნიკალა (ალერსიანი საყვედურით). შე დალოცვილო, ის საჩუქარი კარგა ხანია შენს ოთახშია!

მარგარიტა (გაოცებული). რა საჩუქარი?

ნიკალა. შენი სურათი, ჩემო ღვთაებავ! შენ, შენ დაგხატე... და მერე როგორ!.. შიგ ჩავაქსოვე მთელი ჩემი სული და გული... მთელი გრძნობა და აღმაფრენა...

მარგარიტა. ძვირფასო ნიკოლა! მერედა, სად არის ის სურათი? მე უკვე მჯერა, რომ ის სურათი შედეგია...

ნიკალა. აკი გითხარი, შენს ოთახში დგას, და შენ კი...

მარგარიტა. უკვე აქა დგას? საოცარია! აქამდის როგორ ვერ დავინახე... (კედლებს, ოთახს ათვალიერებს.) აა, ალბათ დამალე... (ეძებს.)

ნიკალა. არა, არ დამიმალავს...

მარგარიტა (დაინახა). ოო, აი თურმე სად ყოფილა! (სურათს შემოატრიალებს და სიამოვნების ღიმილით შეხედავს, მაგრამ ელდანაკრავივით შეკრთება და უკან დიაწევს.) ოჰ, ნუთუ ეს მე ვარ!? (ისტერიული სიცილი აუტყდება.)

ნიკალა (მოიღუშება). რაა? არ მოგწონს?

მარგარიტა (თავს დაიურვებს). მომწონს კი არა, ლამის გავგიჟდე! ჩემო ძვირფასო ნიკოლა, ნეტავი მართლა ასეთი ვიყო, სხვა რაღა მინდა... (სურათს პიანინოს თავზე შედგამს, ერთხანს რაღაცას ფიქრობს, შემდეგ შუბლშეკრული მოტრიალდება და ცივ, საქმიან კილოზე გადადის.) იცი რა, მე მეეჭვება, რომ აქ თქვენმა ეკლესიამ ჭვარი დაგვწეროს...

ნიკალა (გახარებული). როგორ? შენ უკვე თანახმა ხარ?.. მაშ თანახმა ხარ?

მარგარიტა (კუშტად). დიახ, დროა დავამთავროთ! მაგრამ ნუ გავიწყდება, რომ მე კათოლიკე ვარ და შენ კი — მართლმადიდებელი...

ნიკალა. კი, მაგრამ ორივენი ხომ ქრისტიანი ვართ?

მარგარიტა. მოიცა! ჩვენ აი ასე მოვიქცეთ: შენ ეხლავ გასწი და რომელიმე ეკლესიაში ვინმე მღვდელს ჰკითხე...

ნიკალა (აღტაცებული). შენი ჭირიმე... წავალ კი არა, გავფრინდები!.. (კარს მივარდება, მაგრამ შედგება, შემობრუნდება.) მაშ დავიჯერო, რომ თანახმა ხარ? ნამდვილად თანახმა ხარ? თუ... (თვალეში აშტერდება, სურს პასუხი ამოიკითხოს.)

მარგარიტა (შკაცრად). ერთხელ გითხარი და ნუ იგვიანებ! ხვალ დილაზე კი პასუხს მოიტან... ხვალამდე აქ არ დავინახო!..

ნიკალა. "შემიბრალე!.. ხვალ დილაამდე რა გული გასძლებს... ერთ-ორ საათში აქ გავჩნდები. (გარბის.)

მარგარიტა (მისძახის). ნიკოლა! ნუ აჩქარდები. (შემობრუნდება და კვლავ სურათს შეაშტერდება, აცრემლებული სავარძელში ჩაეშვება. შემოდის მადამ ლილი.)

მადამ ლილი. ოჰ, თუ აქედან დროზე არ წავედით, ჩემი გული ვეღარ გაუძლებს ასეთ სიცხეებს. (მარგარიტას შეხედავს.) რა მოხდა, მადმუაზელ! რად იცრემლებით?

მარგარიტა (ცრემლს იწმენდს). არაფერია! გთხოვთ ყურად-
ღებას ნუ მიაქცევთ!

მადამ ლილი. მაინც?!. ვინ გაგაჯავრათ?!

მარგარიტა. მადამ ლილი! აბა გამოიცანით, ეს ვინ არის?

(სურათზე მიუთითებს.)

მადამ ლილი (ლორნეტს მოიმარჯვებს. სურათს აკვირდება,
მხრებს აიჩეჩს). რა მოგახსენოთ!.. ჩემი აზრით, აქ რაღაც უსულო
ტიკინაა გამოხატული...

მარგარიტა. უკაცრავად! სცდებით, მადამ! ეს მე გახლავართ!

მადამ ლილი. მადმუაზელ! ეს სადაური ხუმრობაა!

მარგარიტა. სამწუხაროდ, ასეა, მადამ! ნიკოლამ ასე დამ-
ხატა!.. სული და გული ჩავაქსოვეო... ეს არის თურმე მისი მუზა და
აღმაფრენა...

მადამ ლილი. ფი! ეს ხომ საშინელებაა, სისაძაგლეა! და თუ
ეს მისი აღმაფრენის ნაყოფია, წარმოდგენილი მაქვს, სხვა მაგის
ნაბლაჯნები რაღა იქნება!

მარგარიტა (მკაცრად). მართლაცდა! (სურათს ჩამოიღებს
და სანაგვე კალათასთან იატაკზე დაანარცხებს.) ამის ადგილი აი აქ
არის!.. (სავარძელში ჩაჯდება და სახეზე ხელებს მიიფარებს.)

მადამ ლილი. მადმუაზელ! მე არ მომწონს ეგ თქვენი მწუ-
ხარე პოზა!

მარგარიტა (თავს აიღებს). მადამ ლილი! რაღა დაგიმალოთ,
მე ეს კაცი გულით მომწონდა.

მადამ ლილი (საყვედურით). მადმუაზელ!

მარგარიტა. დიახ, მეტად მომწონდა-მეთქი, და არც უარს
ვეტყოდი, რადგან უკვე მომბეზრდა სხვებთან სულ ეს პირუტყუ-
ლი, უსიხარულო პრანჭვა და გრეხა... რაღაც მაღალი, კეთილშობი-
ლური რამ განვიზრახე ჩემს სიცოცხლეში და... აი ამ მისმა ნაცოდგი-
ლარმა ოცნების ციდან დედამიწაზედ დამანარცხა... უცებ თვალები
ამეხილა... რაღაც ბრაზი და სიცარიელე დაეუფლა მთელ ჩემს არ-
სებას, რადგან ასეთი გატაცებით ჩემს სიცოცხლეში არავისზე მო-
ცნებია... ო, ღმერთო ჩემო, როგორ მოვტყუვდი!

მადამ ლილი. მადმუაზელ, თქვენივ ბრალია! მე არა ერთ-
ხელ გაგაფრთხილეთ, რომ მაგისაგან ბევრს ნურაფერს მოელოთ-
მეთქი.

მარგარიტა. რა ვუყო, მადამ! თავის უძირო გრძნობით, თა-
ვის სულიერ სისპეტაკით და ხატოვანებით ისე ძლიერად მომაჯადო-
ვა, რომ თავიდანვე რაღაც დიდებულ ნიჭის მხატვრად წარმოვიდ-
გინე...

მადამ ლილი. მოკლედ, დამშვიდდით, მადმუაზელ! ეგ სისულელე მალე გაივლის! მე თქვენ ისეთი შესანიშნავი ამბავი მოგიტანეთ, რომ...

მარგარიტა. რა ამბავი?

მადამ ლილი. ბალის პატრონს დავემშვიდობე... ფული სულ მომცა... შესანიშნავი სარეკომენდაციო წერილებიც დამიწერა... ასე რომ, დღეიდან უკვე თავისუფალი ბრძანდებით, მადმუაზელ.

მარგარიტა. მით უკეთესი!.. (მოუსვენრად გაივლ-გამოივლის ოთახში, ფანჯარაში გაიხედავს.) მაგრამ... მე ის მაწუხებს, ნიკოლას რა პასუხს გავცემ! იგი სულ მალე ალბათ აქ გაჩნდება და თუ ელხავე აქედან არ წავედით, დიდი სკანდალი არ აგვცდება...

მადამ ლილი. ჩვენ ეხლავ წავალთ... (იწყებს ჩემოდნების ჩალაგებას.)

მარგარიტა. ასე უცებ სად, სად წავიდეთ? სხვა სასტუმროში? მე მისი ნახვა სრულებით აღარ შემიძლია...

მადამ ლილი. რათა სასტუმროში! (საათს შეხედავს.) ეხლავ სადგურზე! (კაბებსა და ნივთებს ჩემოდანში ყრის.) აბა, თქვენ ნუღარ იგვიანებთ... მოემზადეთ გასამგზავრებლად.

მარგარიტა. მადამ, მე არ მესმის თქვენი განზრახვა...

მადამ ლილი. ეხლავ გაიგებთ! საქმე ის არის, რომ მე ის თქვენი პირველი თაყვანისმცემელი ვინახულე...

მარგარიტა. ვინა? ის კრიჟანგი ლორი?

მადამ ლილი. დიახ, სწორედ ის! მაპატიეთ, მა შერ მადმუაზელ, რომ თქვენს დაუკითხავად ვინახულე, მაგრამ ერთმა ამბავმა მაიძულა...

მარგარიტა. რა ამბავმა?

მადამ ლილი. ბაზარში ყური მოვკარი, რომ თქვენი ნიკოლა თურმე უკვე ბანკროტია...

მარგარიტა. მადამ, ეგ დაუჯერებელია!.. კაცი აქ ეხლა იცი-ნოდს... ცოლობას მთხოვდა...

მადამ ლილი. სწორედ მაგასაც ლაპარაკობდნენ, რომ თურმე მან ეს ჯერ არც კი იცის... ჰოდა, მე ეს ამბავი არ მეჭაშნიკა და ამიტომაც იმ თქვენს „კრიჟანგ ლორს“ მივაშურე... ყოველ შემთხვევისათვის!

მარგარიტა. მერე, რა ვითხრათ?..

მადამ ლილი. თქვენს ბედზე, ძვირფასო მადმუაზელ, ძალიან სასიხარულო რამ მომახსენა...

მარგარიტა. მადამ! ნუ მტანჯავთ! ნიკოლამ არ მოგვისწროს...

მადამ ლილი. მითხრა: ოღონდ მარგარიტა შემირიგდეს და
დღესვე წაგიყვანთ პეტერბურგშიო... მეტი რა გნებავთ?

მარგარიტა (გახარებული). მართლა ასე თქვა?! მადამ ლი-
ლი! თქვენს პირს შაქარი! კი, მაგრამ იმ უსინდისომ რატომ აქამდის
არ მინახულა, თუ შერიგება ასე სწყურია?..

მადამ ლილი. მადმუაზელ! ჩვენ ეხლა კაპრიზების დრო
აღარა გვაქვს... თურმე იმიტომ ვეღარ მობედა, რომ კვლავ გაგ-
დებისა ეშინოდა... დღეს კი სწორედ აქ მოდიოდა, როცა მივედი...
ამიტომაც თავის სათქმელი მე დამაბარა...

მარგარიტა. მაინც რაო, რა დაგაბარათ?

მადამ ლილი (საათს შეხედავს). სრულ ექვს საათზე მოვალ
თქვენთან და თუ მარგარიტა თანახმაა, გასამგზავრებლად მზად
იყავით და იმწამს სადგურში წავიდეთო!

მარგარიტა. ჰმ, თანახმაო?! დღეიდან უკვე სიხარულით და
სიყვარულითაც! იცით, მადამ, აი ამ წუთს რაში დავრწმუნდი?

მადამ ლილი. რაში, მადმუაზელ?

მარგარიტა. რომ ეს ოცნება და იდეალები სულ სისულე-
ლეა... რომ ეს საჩემო საქმე არ არის და ისევ მიჯობს კვლავაც ნა-
ცადი გზებით ვიარო!..

მადამ ლილი. მადმუაზელ, თქვენ ბრძენი ბრძანდებით!
(შუბლზე კოცნის.)

მარგარიტა (უკვე სამგზავროდ გამოწყობილი). ოო, სანატ-
რელო პეტერბურგო! მოვქრივარ შენკენ! აი სად მელის მე ტრიუმფ-
ფი! იქ დამხვდებიან გრაფები და დიდი, ბრწყინვალე თავადები! იქ
ვიპოვი მე ჩემს იდეალს...

მადამ ლილი. მართლაც, მადმუაზელ! თორემ ამ მეშხანურ
პროვინციებში ისე ჩავიხრჩეთ, რომ ვიღაც უნიჭო მეღუტნეები
გენიოსებად გვეჩვენებინ!

(კარზე დაკაკუნება. მარგარიტა მიირბენს და კარს გააღებს. შემოდის ჩასუქებუ-
ლი ვაჭარი ცილინდრით ხელში, სამგზავროდ გამოწყობილი. იგი შეკრულ ჩე-
მოდნებს თვალს მოავლებს, მის თვალებში სიხარულის ცეცხლი იელვებს და
ექსტაზში შესული მუხლებში ჩაუვარდება მარგარიტას.)

მარგარიტა (წამოაყენებს, ჩასუქებული ვაჭარი ხელს
უკოცნის). ძალიანა გთხოვთ, ნუღარ ვაყოვნებთ... რაც სათქმელი
გვაქვს, გზაში ვილაპარაკოთ...

ჩასუქებული ვაჭარი. კეთილი, ქალბატონო! მობრძან-
დით! ეტლი გველოდება!

(ჩემოდნებს წამოავლებენ ხელს და ყველანი საჩქაროდ გადიან. მცირე მუსიკა-
ლური პაუზა. შემორბის ნიკალა უზარმაზარი თაიგულით.)

ნიკალა (გახარებული და აღგზნებული). ძვირფასო მარგარიტა! შეიძლებაო... (უცებ ელდანაცემი შედგება და აყრილ-დაყრილ ოთახს თვალს მოავლებს, საწოლ ოთახშიც შეიხედავს და თავზარ-დაცემულს თაიგული ხელიდან გაუვარდება). წასულა! მუხთლად გაპარულა... ვაი შენს თავსა, ნიკალა ფიროსმანაშვილო! შერცხვენილმა და თავლაფდასხმულმა ეხლა სადღა გსურს თავი გამოჰყო... (თავის სურათს დაინახავს, ხელში აიტაცებს, მკერდზე მიიკრავს.) შენი ჰირიმე... ამ სანაგვესთან შენ აქ რა გინდა? იმან დაგაგდო? აა, ეხლა კი ყველაფერი გასაგებია... (სურათს სკამზე დადგამს და დახატულ მარგარიტას ელაპარაკება.) შე კაი ქალო, ეს რა მიყავი? არა გრცხვენია? გახარებული მისთვის გამგზავნე, რომ აი ასე თავი მოგეჭრა?... რა დაგიშავე, რომ ასე უღმერთოდ გამაწბილე, ჰა? (სურათს უაღერსებს.) შენ გენაცვალე... მაშ მიღალატე? გამიფრინდი, ჩემო პეპელავ? ეე, იმწამს შეგატყე, რომ ეს სურათი არ მოგეწონა... იმწამს შეგატყე, რომ გული ამყარე... მაგრამ, შე დალოცვილო, პირში მეტყობი... შე კაი ქალო, გული მომიკალ, მაგრამ ამ ჩემს სულს რაღას ერჩობი... (სურათს აკვირდება.) ნუთუ მართლა ასე ცუდია?

(შემობრბის ძალზე შეშფოთებული ვარინკა.)

ვარინკა. ნიკალა!.. მადლობა ღმერთს, რომ მოგაგენი! წამოდი ჩქარა... შენი ღუქანი, შენი ოთახი, სუყველაფერი წყეულ დიმიტრამ მიითვისა...

ნიკალა (გარინდებული სურათს ჩასჩერებია). ვინ ვისთან სტყუის — შენ ამ სურათთან თუ სურათი შენთან?..

ვარინკა. ნიკალა, კაცო! არ გესმის, რასაც გეუბნები!?! დიმიტრამ მუხთლად გიღალატა!.. ყალბი ვექსილებით მთელი შენი ქონება დაიმტკიცა... სახლიდან ბარგი გამოგიყარეს... წამოდი ჩქარა...

ნიკალა (თავში ხელს შემოიკრავს). შე საცოდავო, ცოცხალი რაღად დაიარები!.. შენმა ნიჭმა ქალი დააფრთხო! შენმავ სურათმა დაგასამარა!.. (ისტერიულად გადინახარება.)

ვარინკა (ტირილით). არ გესმის, რასაც გეუბნები? ადამიანო, მთლად გაგაუბედურეს... წამოდი-მეთქი!.. (ხელს ჩაჰკიდებს და ძალით გაჰყავს.)

ს უ რ ა თ ი მ ე ხ უ თ ე

კვლავ შუაბაზარი, ნიკალას ღუქანი. ღუქნის წინ ნიკალას ბარგია გამოყრილი. ღუქნის კარში დგას დონჯშემოყრილი დიმიტრა მეზობელი მეღუქნეების თანხლებით.

ყასაბი (იციინის). ჰა, დიმიტრაჯან!.. მაშ მორჩა ეხლა ბედოვლათი ნიკალას საქმე! მომილოცნია, ჩემო ძმაო... მთელი ღუქანი და ეს ოთახი უკვე შენია...

დიმიტრა (იბღინძემა). მაშ!
ბაზაზი. ჰო, ნიკალას საქმე ეხლა მართლაც მორჩენილია...
ადარც კრედიტი... არც დავერი...
მეთევზე. კანეჩნა! ვაჭარ-კაცისთვის ეგ სიკვდილია!
დიმიტრა. ვაჭარი კი არა!.. ეგ რა ვაჭარია!..
ყასაბი (ხარხარებს). მართლაცდა... მღებავია!.. წავიდეს ეხლა
აბრები ხატოს...
დიმიტრა. ანდა იმ თავის მარგარიტასთან იჯამბაზოს!
მეთევზე. რომ მოვიდეს და ფული გვესესხოს?
ყასაბი. არა, ძმაო... კაპიკს არ მივცემ...
ბაზაზი. არც მე... ვაჰ, ეხლა რომ მოვა, რამდენს იჩხუბებს...
ყასაბი. ეე, ხუმრობაა?!. კაცი ულუკმაპუროდ, უსახლკაროდ
ქუჩაში რჩება...
მეთევზე (დიმიტრას). ჰა, ფრთხილად, ძმაო... აქ სისხლი არ
დაიღვაროს!
დიმიტრა. მამა უცხოონდა! ყურებზე ხახვი არ დამაჭრას... ახია
მასზე! მაშ რა ეგონა...
ყასაბი. ერთი ეს მითხარ, რომ გიჩივლოს?..
მეთევზე. მააშ!.. რომ გამოგედავოს, ვექსილები სულ ყალ-
ბიაო!
დიმიტრა. მერე რომ!.. თქვენ ხომ მიმოწმებთ, რომ მთელი
ფული სულ იმ ვილაც ოხერ ქალს ჩააყარა... რომ სულ მთვრალია
და ხელს რაზედ აწერს, ადარც კი ახსოვს...
ბაზაზი. მაგას გიმოწმებთ...
ყასაბი. ეგ ადვილია...
მეთევზე. საქმე ის არის, შენ არაფერი აგიტეხოს... გამწარე-
ბული კაცი — ძნელია!..
სონა (შემოდის ჩქარი ნაბიჯით, გოროდოვოს მოუძღვის წინ).
დიახ, ბატონო!.. ცოფიანი მგელი ხომ გაგიგონია? სწორედ ეგეთი
აფთარია... ბატონო პროხორ, დაგვეხმარე, შენი ჭირიმე, თორემ ამ
ცხვარივით ხალხს სულ ყელებს დაგვჭრის...
პროხორი. ჰმ!.. უყურე შენ, რა მხეცი ყოფილა!.. (დიმიტრას
ემშაკურად თვალს ჩაუკრავს.) მობრძანდეს ერთი!..
სონა (ვილაც დაინახა). ბატონო! აგერ მოდის კიდეცა... დაგვი-
ფარე, შენი ჭირიმე!.. (დიმიტრას, ყურში.) შეხედე ერთი იმ სასიკვ-
დილეს!.. აი თურმე სად გაქცეულა...

(სცენაზე დაძაბული მოლოდინი.)

მეთევზე. პაჰ-პაჰ-პაჰ-პაჰ-პაჰ!.. ეხლა იქნება — რაც იქნება!
(ხელებს იფშენეტს.)

ყასაბი (დიმიტრას.) შენ უკან დადექ!.. უცებ არ დაგეძგეროს!
პროხორი (დიმიტრას.) ის განაჩენი ხომ აქა გაქვს?

დიმიტრა. აჰა, ინებე!.. (ქალაღს გადასცემს. შემოდინ ვა-
რინკა და ნიკალა, რომელსაც ილიაში თავისი სურათი აქვს ამოჩ-
რილი. პროხორი წინ გადაუდგება.)

პროხორი (თვალებს დაუბრიალებს). სტოი! შეჩერდი!.. ეს
შენი ბარგი-ბარხანა აქედან მოაშორე და ამ დუქანთანაც ახლოს გავ-
ლილი არ დაგინახო, თორემ...

(ნიკალა უსიტყვოდ მიდის თავის ბარგთან, აჩონჩხილ სკამებსა და სხვა საოჯა-
ხო ნივთების ქვეშიდან თავის სურათებს აძრობს, საღებავების ყუთს ეძებს.)

მეთევზე. ვაჰ!.. სასწაულია! ძმებო, ხედავთ, რა ჭკვიანად
არის...

ბაზაზი. ეე, ეს რაღაც სხვანაირად იქცევა, აი!.. თითქოს ღარ-
ტყმულსა ჰგავს... (თავის დუქნისაკენ დაიხვეს.)

მეთევზე. ჰა, ამ გიჟმა აქ ქვების სროლა არ აგვიტეხოს...
(ყველანი ეჭვის თვალთ შესცქერიან ნიკალას მოქმედებას.)

ვარინკა (ნიკალას). ნიკალა... კაცო!.. რას გაჩუმებულხარ!..
უთხარი რამე!

ნიკალა (წაიბურტყუნებს). მე სათქმელი არაფერი მაქვს...
(განაგრძობს თავის საქმეს.)

ვარინკა (გულამომჯდარი). ნიკალა!.. ასე როგორ შეიძლება?..
მაშინ მე ვეტყვი! (პროხორს, გამწარებული.) რად, რად აგდებთ ამ
კაცს აქედან?..

პროხორი. იმიტომ, რომ აქ უკვე აღარაფერი აღარ ეკუთვ-
ნის...

ვარინკა. მაშ ვის ეკუთვნის?.. (დიმიტრაზე.) აი ამ ავაზაკსა
და გაიძვერას?!..

დიმიტრა. ხმა ჩაიწყვიტე!..

სონა. უი, ჭაა! შე დასამიწებელო, გამზრდელ ბიძას ეგრე ეტყ-
ვიან?!

ვარინკა. ამას კი არა, მეტსაც გეტყვით, თქვე ქურდებო,
თქვე ავაზაკებო!

პროხორი (ვარინკას მრისხანედ ფეხებს დაუბრაგუნებს). და-
იწი უკან!.. ხმა, კრინტი-მეთქი!.. სასამართლოს აი ამ განაჩენით მა-
გას აქ აღარაფერი აღარ ეკუთვნის...

ვარინკა. ეგ განაჩენი სწორი არ არის... მოსამართლე მო-
ქრთამულია... ის ვექსილები სულ ყალბია... მე დავამტკიცებ...

სონა. უი, ჭა!.. დამიდგეს თვალი!

პროხორი (დიმიტრას). კაცო, მომაშორე ეს მეტიჩარა, თო-

რემ არ ვიცი, რას ავუტეხამ! ეს ხმას არ იღებს და ამას ვინ ჰკითხავს!

დიმიტრა. გიჟია, ბატონო პროხორ! სწორედ ამ დროს მოუვლის ხოლმე! (ხელს სტაცებს ვარინკას და სონას დახმარებით დუქნისაკენ მიათრევს).

ვარინკა (ყვირის). გამიშვით, თქვე უსირცხვილოებო!.. ფუი, თქვენს ნამუსს... ფუი, თქვენს სინდისს! ხალხი კი არა — მგლები ყოფილხართ! (გაუსხლტება ხელიდან და გარბის.)

დიმიტრა. აქ აღარ დაგინახო, შე გველის წიწილო, თორემ თავს გაგიხეთქავ!.. (მისდევს, ხალხი აკავებს.)

პროხორი (აჩოჩქოლებულ ხალხს). ჰა, რა ამბავია! სეირი მორჩა!.. აბა, რაზოიდის! დაიშალენით!... ქუჩებში ხალხის თავის მოყრა აკრძალულია! (სასტვენს ჩაჰბერავს, დამსწრეებს გაყრის, ნიკალას მიუბრუნდება.) შენ კი გაფრთხილებ, აი ასე ჰკვიანად იყავ! ამ ხალხს აქ არაფერი აუტეხო, თორემ... ციხე-ციმბირი უკან დაგრჩება! შენ ეი, დიმიტრა! ნუ გეშინია, მე მალე მოვალ!

დიმიტრა. მობრძანდი, შენი ჭირიმე! აბა, იცოდე, გელოდები...

(პროხორი გადის. დიმიტრა და სონა დუქანში შედიან. ნიკალა თავის სურათების სინჯვას ამთავრებს, სახე თანდათან უბრწყინდება.)

ნიკალა (სურათებს სიყვარულით მიეფერება). თქვენ შემოგველოთ თქვენი ნიკალა... არა! ის სტყუის! თქვენ მართალი ხართ! (საღებავების ყუთს მხარზე გადაიკიდებს, თავის სურათებს იღლიაში ამოიდებს და გაბრწყინებული სახით გასასვლელისაკენ დაიძვრება, მაგრამ დუქნიდან გამოსული სონა წინ გადაუდგება.)

სონა. ნათლი, ცოტა ხანს მოითმინე, სათქმელი რამ მაქვს.

ნიკალა (ზიზღით). რაო, რა გნებავს?

სონა. ბიჭო ნიკალა, არც სულ ეგრე დასაკარგავად გვემეტები... ჩემი გოგიას მომნათვლელი ხარ! აბა სად უნდა წახვიდე, ბიჭო?

ნიკალა. თბილისი დიდი ქალაქია.

სონა. კი, მაგრამ... ასე უსახსროდ... ასე უსახლკაროდ. შეილს გეფიცები, გული მიკვდება. დარჩი ჩვენთან. დიმიტრამ დამაბარა, ჩემთან იმუშავეო. დღეში ათ შაურს გაგიჩენო. (ნიკალა მიდის.) ბიჭო, რათა თაკილობ? ქაა, ასე ხომ დაიღუპები?

ნიკალა. თქვენ დარდი ნუ გაქვთ, სადაც გული და თავი წავაგე, ეგ ხელის ჭუჭყიცი ბარემ იქ იყოს! (დუქანზე მიუთითებს.)

სონა. ბიჭო ნიკალა! ეს გოგო ვარინკა მაინც შეგერთო...

ნიკალა. ვერა, ნათლიდედ! ამიერიდან მე ბერი ვარ. განდებოლი ვარ! (გადის.)

მოქმედება მისამე

თბილისის სამიკიტნო-სარდაფი. მარცხნივ — დახლი, დახლში — მიკიტანი ალექსი. მარჯვნივ, დაბალთალებიან კერქვეშ — მაგიდები, რომლებსაც კერიდან ჩამოშვებული ნავთის დიდი ლამპა მკრთალ შუქსა ჰფენს. ფანჯრის ზედა ნაწილიდან მოჩანს, რომ გარეთ ქუჩაში თოვს.

სამიკიტნოში არავინ არის. მხოლოდ ერთ მაგიდასთან ვიღაც უცნობი ზის და თითქოს სთვლემს. სამიკიტნოში ჩამოდის როსკიბი ქალი ზაფხულის კაბით. იგი დახლთან მივა სიცივისაგან ათრთოლებული.

ქალი. გამარჯობა, ძია ალექსი!

ალექსი. გაგიმარჯოს! ამ თხელ კაბაში რომ გამოსულხარ, არა გცივა? ხომ ხედავ, თოვს!

ქალი. რა ვქნა, მეტი არაფერი მაქვს და... (დახლზე სპილენძის ფულს დაუგდებს.) ერთი არაყი ხელათ გამათბობს!

ალექსი. ეეჰ, შე საცოდავო! (არაყს უსხამს. ქალი სამიკიტნოს მოათვალიერებს, მაგიდასთან მჯდომ უცნობს შეამჩნევს.) აჰა, გადაჰკარ!

ქალი (გახარებული). ოო, რა დიდი ჭიქაა! ძია ალექსი, შენ იღლეგძელე რომ ასეთი გულკეთილი ხარ! (გადაკრავს, ალექსის მიერ მიწოდებულ ლუკმას დააყოლებს. თმიდან ვარდს გამოიძრობს და თეძოების რხევითა და ლილინ-კრუტუნით მიუახლოვდება მაგიდასთან მჯდომს, ვარდს სახეზე მოუცაცუნებს.) ჰა, ყმაწვილო! ვარდი არ გინდა?... ოთახიც აი აქვე ახლოს მაქვს... (ცხვირწინ გასაღებს აუტარ-ჩაუტარებს).

უცნობი (უგემურად შეუბღვერს). გასწი, გაიარე!

ქალი. არა, არ წავალ! (გვერდით მიუჯდება.) მე შენ მომწონხარ. (უხდა აკოცოს, მაგრამ უცნობი ხელით მოიშორებს.)

უცნობი. დროს ნუ კარგავ! გასწი, გაიარე... მეც აქ შენსავით გასათბობად ვარ ჩამოსული.

(შემოდის ხენეშით გოროდოვოი პროხორი. ქალი და უცნობი მის დანახვაზე აიჭურწებიან, სამიკიტნოდან გავარდებიან. პროხორი მტრულად დაუცაცხანებს.)

პროხორი. ბრის! აქ აღარ დაგინახოთ, თქვე მაწანწალებო!.. (ალექსის.) რა სიცივეა... გავფიჩხდი კაცი... სროხნო ერთი თხლაში ჭაჭა! (ალექსი დაუსხამს, პროხორი გადაკრავს, სამიკიტნოს თვალს მოავლებს.) რაშია საქმე? მუშტარი არავინა გყავს?

ალექსი. ცივა... თოვს... თანაც უკვე გვიანია და...

პროხორი. აა! გასაგებია! (ლექვით გადის. მცირე ხნის შემდეგ სამიკიტნოში ჩამოდის ნიკალა. იგი გაუპარსავია, პალტო არ აცვია. გაცვეთილი თხელი პიჯაკ-შარვალი დაჭმუჭნული და საღებავებით შესვრილი აქვს. ხელში საღებავების ყუთი უჭირავს. იგი მაგიდას მიუჯდება; შიგა და შიგ ჭირვეულად ახველებს.)

ნიკალა. მიკიტანო! ერთი არაყი და ცხელი რამ კერძი!

ალექსი. ეხლავე, შენი ჭირიმე! (სამზარეულოში გასძახებს.) ბიჭო, ივანიკა! ერთი კარგი ყაურმა...

ივანიკა (სამზარეულოდან გამოვარდება). ამ წუთში, ბატონო! (კერძს მოუბრუნინებს, ალექსი მაგიდაზე არაყს დაუდგამს. შემოდის იგივე როსკიპი ქალი, ნიკალას ღრეჭით აუვლ-ჩაუვლის. ნიკალა ჭამას შეწყვეტს, ქალს შეხედავს.)

ქალი (მიუახლოვდება). ჰა, ძმობილო! ვარდი არ გინდა? ოთახიც აი აქვე ახლოს მაქვს.

ნიკალა (სკამს მიუდგამს). დაჯექი... (ქალი გახარებული ჩამოჯდება.) მიკიტანო! კიდევ ერთი ცხელი კერძი და... ერთი ჩარე-ქა კარგი ღვინო...

ალექსი. ამ წუთში, შენი ჭირიმე!.. ბიჭო ივანიკა!.. (ივანიკა კერძს მიუბრუნინებს, ალექსი ღვინოს დაუდგამს მაგიდაზე. ნიკალა და ქალი უსიტყვოდ ჭამენ.)

ქალი (ჭამას ამთავრებს და შეაშტერდება ნიკალას, რომელიც სამიკიტნოს შიშველ კედლებს ათვალიერებს). შენც მორჩი ჭამას?

ნიკალა. დიახ... რა იყო?

ქალი. მაშ წავიდეთ...

ნიკალა. სად?

ქალი. ჩემთან... (გასაღებს აჩვენებს.) აი, აქვეა...

ნიკალა. არა, გეთაყვა...

ქალი (გაოცებული). მაშ რად დამპატიე?.. რისთვის მაჭამე?..

ნიკალა. როგორ თუ რად? მაშ ქვეყანაზე ადამიანობა აღარ ყოფილა?

ქალი (ნაწყენი წამოდგება). ეე, შენ, გეტყობა, არა მკადრულობ!

ნიკალა. პირიქით, ქალო... შენი ცქერით გული მიკვდება...

ქალი (დამცინავად გადიხარხარებს). ოო, შენ ძალიან გულკე-

თილი კაცი ყოფილხარ... (უცებ მოეშვება, წაბარბაცდება.) ღმერთო... როგორ დავიღალე... ისე მეძინება, რომ თვალებს ძლივს ვახელ.

ნიკალა. ჰოდა, გასწი შენს სახლში. ნურსად შეუხვევ, ეს ღამე მაინც დაიძინე ადამიანურად.

ქალი. მართლაცდა, ერთ ღამეს მაინც დავისვენებ... (საბრალო ღიმილით.) მაშ მშვიდობით... დიდი მადლობა...

ნიკალა. მოიცა... (ჯიბიდან ფულს ამოიღებს და ხელში ჩაუდებს.) აჰა, წაიღე, ხვალ სათბილობელი იყიდე რამე, თორემ ასე ხომ დაჭლექდები, გოგო!

ქალი (კვლავ ძალზე გაოცებული შეაშტერდება). ჰმ.. შენ კაცი კი არა — ქრისტე ყოფილხარ! (გულაჩუყებული სამიკიტნოდან გავარდება. ნიკალა სიბრალოდ თვალს გააყოლებს, უცებ რაღაც ფიქრი დაებადება, საჩქაროდ გახსნის თავის ყუთს, ქაღალდის ფურცელს ამოიღებს და სწრაფად ხატავს. ალექსი მიუახლოვდება, დასცქერის.)

ალექსი. ვაჰ, ეგ რა არის?

ნიკალა (თავს აიღებს). იმ ქალსა ვხატავ... (ფულს აძლევს.) აჰა, ეს ჩემი დანახარჯი...

ალექსი (ფულს გამოართმევს). შენ რა — მხატვარი ხარ?.. (ნიკალა თავს დაუქნევს, ხატვას განაგრძობს.) ალბათ აბრებსა ხატავ.

ნიკალა. დიახ, აბრებსაც...

ალექსი. დალოცვილო, მაშ მღებავი ყოფილხარ და...

ნიკალა. არა, ძმობილო, მღებავი კი არა, მე მხატვარი ვარ! აბრებს მხოლოდ ლუკმაპურისთვის ვხატავ...

ალექსი. ბოდიში, ძმაო... კიდევაც მხატვარი ბრძანდებოდე... მაგრამ რის დახატვა შეგიძლიან, ჰა?

ნიკალა. სუყველაფრისა...

ალექსი. ვაჰ! კაცს დახატავ?

ნიკალა. კაცსაც და ქალსაც...

ალექსი. ცხოველებსაც?

ნიკალა. ცხოველებსაც და ფრინველებსაც... აი ამ ღუქანს, თუ გინდა, ისე მოგიხატავ, რომ...

ალექსი. შენ გენაცვალე!.. (გვერდით მიუჯდება.) მაინც, რას დამიხატავ?..

ნიკალა. რას და, თავში ბევრი რამ მიტრიალებს... აი თუნდაც აქ, ჩამოსასვლელთან, მთელ ამ კედელზე დაგიხატავდი ერთ თბილისელ ყარაჩოხელსა, რომელიც ყველა აქ ჩამოსულს ალალ ღიმილით აი ასეთი ყანწით მიეგებება!

ალექსი. ბიჭოს, ეგ, მართლაც, კარგი იქნება... ეს იქნება ჩვენი ქართული მასპინძლობა!

ნიკალა. ღიას!.. აი აქეთ კი კარგია, რომ დაგვეხატნა კახეთის რთველი... გვეჩვენებინა ჩვენი ქვეყნის დოვლათ-ბარაქა.

ალექსი. აუჰ, შენი ჭირიმე!

ნიკალა. აი აქ საწნახელი... შიგ ჭარმაგი ვაჟკაცი გლეხი ყურძენსა სწურავს... ვენახიდან კი მოაქვთ და მოაქვთ სავსე გოდრები.

ალექსი. ბიჭო და, მაგით ხომ ამაშენებ! ვაჰ, რა მუშტარი დამედება...

ნიკალა. ამ კედელზე კი გამოვსახოთ ჩვენი დიდება — თამარ მეფე და ტარიელივით მისთვის ხელი სულმნათი შოთა.

ალექსი. ვაჰ, ძმაო, რა ოქროპირი ვინმე ყოფილხარ!

ნიკალა. იმ კედელზე კი — სააკაძე ლაშქარს მოუძღვის. აქეთიქიდან ხალხი მორბის, რომ ჩქარა მის ლაშქარს შეუერთდეს... თვითონ გიორგი დროშასა კოცნის და გმირულ ფიცსა სდებს, რომ საქართველოს გამოიხსნის მტარვალეებისგან...

ალექსი. ბიჭოს, ასე მგონია, ეს კედლები გაცოცხლდნენ-მეთქი.

ნიკალა. მაშ რაა... მოქეიფენი შეხედავენ და ასე იტყვიან: ძმებო, აი რა გმირი წინაპრები გვყოლიაო, და თვითონაც ბრძოლის უინი აიტანთ!

ალექსი. სწორია, ძმაო... მართალია! ჩვენი ილია და აკაკიც ხომ ეგრე სჩადიან!

ნიკალა. მაშ რაა! იცი, სურათი რა დიდი იარაღია! მუშტარი უნდა დააფიქრო თავის წარსულზე, თავისი ხალხის ბედ-იღბალზე და მომავალზე... ვაჟკაცური სული უნდა ჩაჰბერო...

ალექსი. ჰო, ჰო... ეგეც კარგად სთქვი! თუმცა, იცი რა?

ნიკალა. რა?

ალექსი. მოდი, ამასაც ნუ დაივიწყებ... აი აქ ღვინის დოქი, მწვადი, ცოცხალი და მწვანე კიტრები დამიხატე, რომ მუშტარს უფრო იშტა გაეხსნას...

ნიკალა (ჩაიღიმებს) ეგეც შეიძლება...

ალექსი. ვაჰ, დალოცვილო, ეს რა ყოფილხარ! სადაური ხარ?

ნიკალა. ქიზიყელი... მირზაანიდან...

ალექსი. შენი სახელი?

ნიკალა. ნიკალა... ფიროსმანაშვილი...

ალექსი. ჰოდა, ჩემო ნიკალა, იცი, რას გეტყვი... მოდი და, ბარემ ეხლავ მოვრიგდეთ...

ნიკალა. მე მორიგება არ ვიცი ხოლმე...

აღექსი (შუბლს შეიკრავს). აბა მაშ როგორ?..
ნიკალა. ვიდრე კედლებს მოგიხატავდე — მაჭმევ და მასმევ...
აღექსი. ჩემი თავი შენ გენაცვალოს!
ნიკალა. მხოლოდ, გაფრთხილებ... როცა ვმუშაობ, უარყოთ
არ შემძლიან...
აღექსი. როგორ? თან ლოთობ?
ნიკალა. კი არ ვლოთობ, არაყს რომ დავლევ — უფრო კარ-
გად ვგრძნობ... უკეთა ვხედავ...
აღექსი. ჰოო? მაშ თუ ეგრეა — არაყს, თუ გინდა, ჩაფით და-
გიდგამ... შენ ეს მითხარი, ფულს რამდენს ითხოვ, რომ ეს კედლები
აი, როგორც თქვი, ისე ლამაზად მომიხატო...
ნიკალა. რამდენის საღებავებიც დასჭირდება...
აღექსი. შენი გასამრჯელო?
ნიკალა. მე ფულს არ ვიღებ...
აღექსი (გაოცებული). როგორ? თაკილობ?... (ტანისამოსზე
ახედ-დახედავს.) შე კაი კაცი, მე როგორც გატყობ, შენ ძალიან გი-
ჭირს... ბინაც არა გაქვს...
ნიკალა (კუშტად). მერე შენ რაა!.. სამაგიეროდ მეგობრები
მყავს...
აღექსი. როგორ თუ რაა?! მეც ქართველი ვარ... ძალიან მი-
ყვარს ჩემი ხალხი, ჩემი ქვეყანა... შე დალოცვილო, აბა გულგრი-
ლად როგორ ვუყურო, რომ შენისთანა ქართველი კაცი ამ ცივ ზამ-
თარში აი ასე დაიარება... ანდა, მითხარი, ამ თოვლიან შუალამისას
რომელ მეგობარს მიადგები?! ეე, იცი, რა გითხრა: მაშ რაკი ფულ-
ზე უარს ამბობ, ასე მოვრიგდეთ... აქ, ჩემთან დარჩი... ქართველმა
კაცმა ამ ქართველ აღექსასთან ითავშესაფრე... თორემ მაგ შენი
ხველების გაგონებაზე ჯიგარი მეწვის...
ნიკალა. ვთქვათ, დავრჩი!.. მერე?
აღექსი. მერე რა? ჩემთან იმუშავე! ჯამაგირს მოგცემ... ტანთ
ჩაგაცმევ. გაჭმევ და გასმევ... აი ამ სამზარეულოში გექნება ბინა...
როცა საქმიდან მოიცილი ხოლმე — მაშინა ხატე, რამდენიც გინდა...
ა, ყაბულ?
ნიკალა. არა, ძმაო! მე ბორკილებს ვერ დავიღებ... შე კაი კა-
ცი, ამ გაჭირვებას იმიტომ ვიტან, რომ ჩიტვით თავისუფალი ვარ
და ჩემი საყვარელი ხელობის მეტს სხვას არავის ვემსახურები...
დალოცვილო, ეს ერთადერთი სიკეთეა მჭირს და ამასაც მართ-
მევ?!.. (ახველებს, კარისაკენ მიდის. აღექსი ხელს სტაცებს.)
აღექსი. მოიცა-მეთქი!.. მე შენ აღარსად არ გაგიშვებ... ჩემ-
მა მზემ, ასე არავინ მომწონებია... უსახლკარო, ლატაკი კაცი და ასე-

თი თავმოყვარე?! ვაჰ, შენც გრაფი ხარ რაღა! თუ ძმა ხარ, დარჩი! ისე მიმიღე, როგორც შენი მახლობელი და ნათესავი... როგორც შენ გინდა, ისე იყოს... მე თანახმა ვარ! შენ ეს კედლები მომიხატე და დანარჩენი პატივისცემა ჩემზედ იყოს. ჰა, ყაბული? (ხელს გაუწვდის.)

ნიკალა. ამაზე ყაბულ... (ხელს ჩამოართმევს.)

ალექსი. შენ გენაცვალე! (გადაჰკოცნის, სამზარეულოსაკენ მიჰყავს.) მაშ მოდი ამაღამ კარგად გამოშუშდი, ალალი ქვეყნის ალალო შვილო, თორემ... თვალეებზე გატყობ, რომ ისე უომეროდ გეძინება. ეჭვი, ბიჭო ივანიკა!

ივანიკა (გამოვარდება). ბატონო, რას მიბრძანებ?

ალექსი. შვილო, უკვე გვიან არი... დავკეტოთ ჩვენი სამიკიტნო. ამ თოვლში უკვე აღარავინ მოვა... მუსას უთხარი ცეცხლი ჩააქროს. დარჩენილი კერძები დააბინაოს... ამ კაცს კი ტახტზე ტომრები გაუშალე... ზემოდან ჩემი ნაბადი მიახურე...

ივანიკა. ეხლავე, ბატონო... (ნიკალას სამზარეულოში შეუძღვება. ალექსი დახლში საქმიანობს, მაგრამ უცებ იღება კარი და სამიკიტნოში ჩამორბის გოროდოვოს პროხორი.)

პროხორი. ალექსი! ჩქარა პასპორტები მოამზადეთ... ადგილიდან არვინ დაიძრას! თვით გენერალ-გუბერნატორის ბრძანებით „აბლაგა“ საეჭვო ხალხზე... (კარში გამოჩნდება პოლიციის ბოქაული ორი ჯარისკაცის თანხლებით.) მობრძანდით, თქვენო კეთილშობილებავ...

ბოქაული (ალექსის). სამიკიტნოს პატრონი თქვენ ხართ?

ალექსი. დიახ, ბატონო...

ბოქაული (დუქანს მოათვალიერებს) მუშტარი უკვე არავინა გყავთ?

ალექსი. არა, ბატონო! დაკეტვას ვაპირებდი...

ბოქაული. თქვენ, რა თქმა უნდა, გაქვთ პასპორტი?

ალექსი. ინებეთ, ბატონო! (მიაწვდის.)

ბოქაული (ჩაიხედავს, კითხულობს). ალექსი დავითაშვილი... კეთილი! (უკან უბრუნებს.) აქ ვინ გყავთ კიდევ?

ალექსი. მზარეული მუსა ცხოვრებოვი და ხელზე მოსამსახურე ბიჭი ივანიკა ფხაკაძე...

ბოქაული. სად არიან?

ალექსი. აი აქ, ბატონო... სამზარეულოში.

ბოქაული. აჰა! (შედის სამზარეულოში პროხორის თანხლებით და მცირე პაუზის შემდეგ გამოდის. პროხორს გამოჰყავს ნიკა-

ლა.) აკი მარტო მზარეული და მოსამსახურე ბიჭიაო?! რაშია საქმე?
ამას მიმაღავთ?

ალექსი. არა, ბატონო... არ მომაგონდა, თორემ დამალვას როგორ გავბედავდი!

ბოქაული (მრისხანედ თვალებს დაუბრიალებს). ჰაა, ასეთები არ იყოს, თორემ... (ნიკალას.) შენი პასპორტი! (ნიკალა დუმს.) შენი პასპორტი-მეთქი, შე სალახანავ!

ნიკალა. არა მაქვს... სადღაც დავკარგე...

ბოქაული. ვის ატყუებ, შე არამზადავ! შენი მისამართი? (ნიკალა დუმს). აა, უსახლკარო მაწანწალა ხარ? სწორედ შენისთანებს დავეძებთ ეხლა!.. (ალექსის.) ეს საექვო პირი აქ როგორ გაჩნდა?.. ნათესავია?

ალექსი. არა, ბატონო... ავად არის და შემებრალა...

ბოქაული (დაცინვით). აჰ, შეგებრალათ, ხომ? აი ეს რომ ამალამ ყელებს დაგჭრიდათ, მაშინ მიხვდებოდით, რომ ასეთების შებრალება არ შეიძლება... (ჯარისკაცებს.) წამოიყვანეთ...

ალექსი. ბატონო, ძალიანა გთხოვთ... საწყალი მხატვარია... უწყინარი, პატოსანი.

ბოქაული. ვიდრე მის პიროვნებას არ დავადგენ, ვერ გავუშვებ...

ალექსი. ბატონო, მე ვუდგები მაგას თავდებად...

ბოქაული. ეგ არა კმარა...

ალექსი. თუ საჭიროა — ფულად გირაოს მოგართმევდით!

ბოქაული. ათი თუმანი!

ალექსი. ეხლავე, ბატონო! (დახლს მივარდება, ფულს ამოიღებს და გადასთვლის; შეწუხებული.) ბატონო, დღეს ვაჭრობა სულ არა მქონდა... აი ამ ოთხ თუმანზე მეტი არ არის...

ბოქაული. ათი თუმანი! ნაკლები არც ერთი კაპიკი!

ალექსი. ბატონო, დანარჩენს ხვალ მოგართმევთ... აბა ეხლა სახლში და უკან სად ვირბინო...

ბოქაული (თვალებს გადმოუბრიალებს). რას მევაჭრები?! მე აქ შენსავით მიკიტანი ხომ არ გგონივარ!

ალექსი. მაშ თუ ეგრეა, ამ ფულთან ერთად ეს ჩემი ქამარიც სართად წაიღე... (თავის ვერცხლის ქამარს მოიხსნის და ფულთან ერთად ხელში მიაჩეჩებს.) შე კაი კაცო, მეტი რა გინდა!

პროზორი (ბოქაულს, მოწიწებით). თქვენო კეთილშობილება! ესენი რომ ქამარს გაიმეტებენ — იცოდეთ, ეს დიდი ამბავია...

ათი თუმანი ეს ქამარი ღირს...

ბოქაული. კარგია! იყოს... (ჯარისკაცებს.) გამოუშვით! (ნი-

კალა სამიკიტნოში ჩამოდის). აბა, გავსწიოთ... (ბოქაული და პრო-
ხორი გადიან.)

ნიკალა (ალექსის). ძმაო, დიდი მადლობა! ღმერთმა გამრავ-
ლოს, მაგრამ... ხომ ხედავ, ჩემი დარჩენა რა ძვირად დაგიჯდა...

ალექსი (იციინის). ეჰ! ეგეც არაფერია! შენ კარგად იყავ და
ამ ზარალს სულაც იმ შენს სურათებიდან გავინაღდებ!

ს უ რ ა თ ი მ ე შ ვ ი დ ე

იგივე სამიკიტნო, რომლის კედლებიც თითქმის მთლიანად მოხატულია. თვით
ნიკალა კედელთან ზის და ლილინებს, თან სურათს ხატავს. წინ, იატაკზე — საღე-
ბავები. გვერდით, მაგიდაზე, არყის ბოთლი და ჭიქა. ალექსი თავზე დასდგომია
და მის მუშაობას უყურებს. ივანია სამიკიტნოში მირბი-მორბის და მუშტრებს
ისტუმრებს.

ალექსი. ნიკალაჯან! აი აქ ერთი კურდღელიც რომ მიახატო...

ნიკალა (ყრუდ). არ არის საჭირო...

ალექსი. ვაჰ, მე კი მგონია, რომ საჭიროა... ბოლოს და ბო-
ლოს შემკვეთი მე ვარ და ერთხელ მაინც ხომ უნდა დამიჯერო! (ნი-
კალა ფუნჯს იატაკზე დაახეთქებს, ათრთოლებული ხელით არაყს
დაისხამს.) ძმაო, მეგობარო!.. რა გაბრაზებს! ნუთუ ერთი პატარა
კურდღლის დახატვა ეგრე გეძნელება?!

ნიკალა (მრისხანედ). კი არ მეძნელება, გეუბნები, საჭირო
არ არის-მეთქი! ეს ადგილი ასე უნდა იყოს... მთლიანად სურათს
არ მოუხდება...

ალექსი. მე კი მგონია, რომ მოუხდება!

ნიკალა (წამოვარდება, ფუნჯს ხელში მიაჩეჩებს). მოუხდება
და აჰა, შენ თვითონ მიახატე!

ალექსი. ეე, დალოცვილო! მე რომ ხატვა შემეძლოს...

ნიკალა. ჰოდა, როცა არ შეგიძლიან, შენს ქერქში დაეტიე!..
რამდენჯერ გითხარ, მხატვარი თავისუფალი გულის კაცია... თავის
გუნებად, როგორც მოსწონს და როგორცა ხედავს, ისე უნდა დახა-
ტოს-მეთქი... ეგრე ბრძანებით ვის გაუგია...

ალექსი. ოო, რა ჯიუტი ხარ!..

ნიკალა. არ მიყვარს, არა, როცა ჩემს საქმეში სხვა ერევა...
შენ მიკიტანი ხარ და გასწი, შენს დახლში დადექ! (წასასვლელად
გაიწევეს, მაგრამ ალექსი მკლავში ჩააფრინდება.)

ალექსი. ნიკალაჯან, დიდი ბოდიში... ოღონდ ნუ წახვალ და...
როგორც გენებოს, ისე დახატე... დაბრძანდი, ძმაო, იმუშავე... ხელს
არ შეგიშლი...

ნიკალა (გულზე მოეფონება). შე კაი კაცო, სამი წელიწადია შენთან ვარ და აქამდე ჩემი ხასიათი ვერ გაიგე... (ხატავს. ალექსი დახლისაკენ მიდის. გარედან მოისმის არღნის დაკვრა და მოქეიფეთა შეძახილები. სამიკიტნოში ჩამოდიან შექეიფიანებული მდიდარი მოიჯარადრე დავით ზურაბიჩი, რომელსაც მკლავგაყრით შემოჰყავს ძვირფასად ჩაცმული ვარინკა და დავით ზურაბიჩის ამფსონები. მთელ ამ კომპანიას შემოსდევენ მედუღუკეები.)

დავით ზურაბიჩი (მხიარული სიცილით). ჰაა! მახლას! ქართველი ალექსა აქ გახლავს?!

ალექსი (გახარებული მიეგებება). ოო, დავით ზურაბიჩ, მობრძანდით, ძვირფასო! აქ გახლავს, აქ!

დავით ზურაბიჩი (გადაჰკოცნის ალექსის. ვარინკას მოუტრიალდება). აი, ეს გახლავს ის ქართველი ალექსა...

(ვარინკა ხელს ჩამოართმევს.)

ალექსი. ეე, დავით ზურაბიჩ!.. ძალიან კი გემდური, აი!

დავით ზურაბიჩი. რათა? რა დაგიშავე, ჩემო ალექსი!

ალექსი. დამივიწყე! სულ სხვებთან ქეიფობ... არ ვიცი, რაზედ შემომწყყერი...

დავით ზურაბიჩი. არა, ჩემო ალექსი!.. ჯერ რუსეთში ვიყავ, მერე საზღვარგარეთაც მომიხნდა წასვლა ჩემს საიჯარადრო საქმეებზე და ძალიან მოუცლელად ვარ...

ალექსი (სიცილით). ვაჰ, ფიცი მწამს და ბოლო მაკვირვებს... დალოცვილო, ძალიან ნაქეიფარი კი ჩანხარ და...

დავით ზურაბიჩი. ჰოო... დღეს, მართლაც, ძალიან ატეხილები ვართ... ნახევარ თბილისის სამიკიტნოები შემოვიარეთ... აი ეს ჩვენი ქალბატონი ამიხირდა, გინდა თუ არა ყველა სამიკიტნოები უნდა მაჩვენოო... ჰოდა, მეც ავყევი ამ ხნის კაცი... უარი ვეღარ გავუბედე... (იციინის, ვარინკას ხელს მოხვევს. ამფსონებიც ხარხარებენ.)

ალექსი. აა, გასაგებია! ეხლავე ისეთ სუფრას გაგიშლით, რომ.. ბიჭო ივანიკა!

დავით ზურაბიჩი. აბა, შენ იცი... აგერ იქ, მოფარებულ კუთხეში გაგვიშალე... შენებურად გაგვიმასპინძლდი...

ალექსი. შენ ფიქრი ნუ გაქვს. (დატრიალდება და ივანიკასაც დაატრიალებს.)

დავით ზურაბიჩი. ჩვენ კი, ვიდრე ალექსი სუფრას გაგვიშლის, ერთი ლაზათიანად მოვილხინოთ! (მედუღუკეებს.) შენ დაუკარ!

(მედუღუკეები უკრავენ საცეკვაოს, წრეში I ამფსონი გადმოხტება, მღერის და ცეკვავს.)

I ამფსონი.

რა ხელს მოგვეცემს ქონება,
რომ გავცვივით გონება,
რაც მოვიგოთ — შევჭამოთ,
ხვალაც ღვით გვექონება!
მოდით, ძმებო, დავლიოთ,
რაც მოგვივა — მოგვივა!
ისევ ჯობს მოვიხლინოთ,
რაც მოგვივა — მოგვივა!

(საერთო შეძახილები, ტაში და ცეკვა. II ამფსონი შეენაცვლება პირველს)

II ამფსონი.

ლატაკს ნუ დავიბრიყვებთ,
ყველას კეთილი ვუყოთ...
უფალს მოვეწონებით
თუ ამ საქმეს ხელსა ვყოფთ!
მაშ დავლიოთ ძმებოჯან,
რაც მოგვივა — მოგვივა!
კარგად გამოვიბრუოთ,
რაც მოგვივა—მოგვივა!

(ცვლავ ყველანი ერთად მღერიან და ცეკვავენ.)

ა ლ ე ქ ს ი (მოირბენს). აბა, დავით ზურაბიჩი!.. სუფრა უკვე მზად გახლავს!.. (მოქეიფენი მხიარული სიცილით სუფრისაკენ გაეშურებიან, მაგრამ დავით ზურაბიჩი უცებ გაცეხებული შეჩერდება, კედლებს თვალს მოავლებს.)

და ვ ი თ ზ უ რ ა ბ ი ჩ ი. ბიჭოს, მთელი ღუქანი მოგიხატინებია?

ა ლ ე ქ ს ი (თავმომწონედ). დიახ, დავით ზურაბიჩი.. აგერ იმ მხატვარს მოვახატინე... (შორეულ კუთხეში მიუთითებს. ვარინკა ნიკალას დანახვაზე შეკრთება, თვალები სიხარულით გაუბრწყინდება.)

და ვ ი თ ზ უ რ ა ბ ი ჩ ი. დალოცვილო!.. ეს რა მხატვრობაა! ნამდვილი მხატვარი ვეღარ იშოვე?.. მეტყობდი და ისეთ ტრაფარეტებს გამოგიგზავნიდი, რომ...

ა ლ ე ქ ს ი. რა, დავით ზურაბიჩი, არ მოგწონს?..

და ვ ი თ ზ უ რ ა ბ ი ჩ ი. ბიჭო და, რა არის აქ მოსაწონი?.. ჰმ... თამარ მეფე!.. რუსთაველი!.. გიორგი სააკაძე! აბა ეს სურათები ვის რად უნდა...

ა ლ ე ქ ს ი. აბა მაშ რა?

და ვ ი თ ზ უ რ ა ბ ი ჩ ი. რა და, რუსეთშიც და საზღვარგარეთაც რესტორანებში სულ შიშველ ქალებს და ფრთიან ამურჩიკებს ხატავენ ეხლა..

აღექსი. მერედა, ეგ მუშტარს რას ეტყვის?

დავით ზურაბიჩი (გადიხარხარებს). როგორ თუ რასა!.. ტრფობის საღერღელს აუშლის ხელად...

ნიკალა (ვერ მოითმენს, შემობრუნდება). ქართველ კაცს ეგენი არა სჭირდება!.. ქართული სუფრა მუდამ ჭკუის სასწავლო და გონების სალესავია...

დავით ზურაბიჩი. გაჩუმდი ერთი, მამა გიცხონდა!.. ასე ხომ ჩემი ბავშვიცა თხუპნის!..

(ამფსონები ხარხარებენ.)

I ამფსონი. მართლაცდა, ერთი ამას შეხედე!..

II ამფსონი. ვაჰ, რა ყველას თვალეები დაუჭყეტია!..

(კვლავ სიცილი.)

აღექსი (ჩუმად). დავით ზურაბიჩი... შენ გენაცვალე, ძალიანა გთხოვ... ეწყინება და...

დავით ზურაბიჩი. ჰმ! ეწყინება და, ცივი წყალი დალიოს... ეგ მხატვარი კი არა, ვილაც ჟულიკია!..

ნიკალა (ფეხზე წამოიჭრება). ჟულიკიცა ხარ და არამზადაც! არც არაფერი გაგეგება, შე მეტიჩარავ!..

დავით ზურაბიჩი. რაო?.. ეგ რა თქვი?! (მრისხანედ დაიძვრება ნიკალასაკენ, მაგრამ ვარინკა მივარდება და უკან ეწევა.)

ვარინკა. დავით ზურაბიჩი!.. შენი ჭირიმე!.. თუ ჩემი ხათრი გაქვს, ამ ბედნიერ დღეს ნუ ჩამაშხამებ! რას ჩააცივდით ამ ნახატებსა... ჩვენ ხომ აქ სამხიარულოდ ჩამოვედით.

I ამფსონი. მართლაცდა!.. ამ ცეკვა-ხტუნვაში ისე მომშინენია, რომ...

II ამფსონი. დავით ზურაბიჩი! ეს სურათ-მურათები რა ჩვენს საქმეა... წამო, ძმაო, ღვინო დავლიოთ...

აღექსი. მობრძანდით! აქეთ მობრძანდით, თქვენი ჭირიმე... (მეორე კუთხისაკენ მიჰყავს.)

დავით ზურაბიჩი. კეთილი, მეგობრებო! კეთილი! მაშ თუ ქეიფია — ქეიფი იყოს!... (ყველანი მიეფარებიან კედლის კუთხეს, საიდანაც მოისმის ჯერ სიცილ-ხარხარი, ხოლო შემდეგ დუღუქის ტკბილი კვნესა. კუთხის იქიდან ფრთხილად გამოდის ვარინკა, ნიკალასთან მიიბრუნს.)

ვარინკა (დახშული ხმით). ნიკალა!..

ნიკალა (მოიხედავს). ოჰ, ვარინკა, შენა?..

ვარინკა. ჰო, მე ვარ... ასე რად მიყურებ?.. შენ არც კი იცი, იმის შემდეგ რა გადამხდა...

ნიკალა. ჰო, ჰო, მართლა!.. რა გადაგხდა?
ვარინკა. დიმიტრამ სახლიდან გამომაგდო... სასიკვდილოდ
ალარ დამინდო... თვითონ შენც იმიტომ გაგალატა, რომ არ მინდო-
მე და ჩემი ქმრობით ხელთ ვერ მოგიგდო...

ნიკალა. რას ამბობ, ქალო?!
ვარინკა. დიას, დიას! შენ იმ არტისტკას დასდევდი მაშინ და
ყველაფერი გამოგეპარა... მეც, უბედური, ისეთი მორცხვი ვიყავი
მაშინ, რომ ვერაფერი ვერ გაგიბედე... ეხლა კი... ყველაფერი და-
კარგული მაქვს... სირცხვილიც და უმანკოებაც... ჰოდა, აი ეხლა
გეუბნები, რომ გაგიყვებით მიყვარდი მაშინ... ეხლაც ისევ ისე მი-
ყვარხარ... მოსვენებას ველარ ვპოულობ... სულ შენ დაგეძებ... მითხ-
რეს, სამიკიტნოებში სურათებს ხატავსო და აი, როგორც იქნა, მოგა-
გენი...

ნიკალა. მერე და მაგ მაჯლაჯუნას სამიკიტნოებში როგორ
დასდევ...
ვარინკა. ჩემო ნიკალა!.. ეგ მაჯლაჯუნა ბოროტი გულის კაცი
არ არი... მაგის დაცინვას გულთან ახლოს ნუ მიიტან... უკვე მთვრა-
ლია... ეგ რომ არ შემხვედროდა, მე დღეს ალბათ სულ დაღუპული
ვიქნებოდი... მაგან შემიბრალა... თავის ოჯახში მოსამსახურედ მიმი-
ყვანა. მერე კი... ცალკე გადამიყვანა... ჩემთვის პატარა სახლიც მი-
ყიდა... ფულით ამავსო... ძალიან მწყალობს...

ნიკალა (ამოიხრებს). ეეჰ...
ვარინკა. აბა მაშ რა მექნა უსახლკარო, ულუკმაპურო გამო-
უცდელ ქალს... კიდევაც ჩემი მდგომარეობა სჯობია სხვისას. მაგრამ
მე მაინც ნაღველი მახრჩობს... სულ შენზე ვფიქრობ... უშენოდ ჩი-
მი სიცოცხლე ჩალად არა ღირს... (ნიკალა თავს ჩალუნავს, ხელებს
სახეზე მიიფარებს.) ჩემო ნიკალა! რატომ არაფერს მეტყვი?... ან
იქნება ისევ ის წყეული ვიყვარს?... ჰმ, ნეტავ რა იყო ისეთი, რომ
ველარ ივიწყებ?!

ნიკალა. შენი ჭირიმე... იმას ნულარ მიხსენებ...
ვარინკა. თუმცა, აი მეც ხომ ვერ გივიწყებ... (უცებ მიმოი-
ხედავს და უფრო დახშული ხმით.) ნიკალა! იცი, მე ბევრი ფული
მაქვს... ჰოდა, წამო, გავიქცეთ... სადმე სხვაგან გადავიხვეწოთ...
დავივიწყოთ ჩვენი წარსული და... მე შენ ისე მოგივლი... ისე გა-
ცხოვრებ...

ნიკალა (გულაჩუყებული). ქალო, რა გინდა, რას შემომიჩნდი?
ვარინკა (სახეზე ხელს მოუცატუნებს). ჩემო ნიკალა... შენი
ჭირიმე... ნება მომეცი, ერთხელ გაკოცო...
ნიკალა (შეკრთება, ფეხზე წამოიჭრება).

ვარინკა. შენ გენაცვალოს შენი ვარინკა! სიზმრად თუ ცხად-
ლივ შენ მეღანდები... (კვლავ მისკენ მიიწევს, მაგრამ ნიკალა ხე-
ლით შეაჩერებს.)

ნიკალა. შენი ჭირიმე, ნუ მაცდუნებ...

ვარინკა. ნიკალა, შემიბრალე... ძლივს გიპოვე და... ნუ დამ-
ტოვებ, შენი ჭირიმე...

ნიკალა. ო, არა, არა... გაჩუმდი-მეთქი... სული ნუ ამიფორია-
ქე... კაცი ჯვარზე ნუ გამაკარი... (სამიკიტნოდან გავარდება, ვარინ-
კა იქვე მაგიდაზე დაემხო და მწარედ ქვითინებს.)

ს უ რ ა თ ი მ ი რ ვ ე

იგივე სამიკიტნო. სამიკიტნოში არავინაა. მხოლოდ ბნელ კუთხეში მოჩანს
მაგიდაზე თავდახრილი უცნობი, რომელიც დრო და დრო ხვრინავს. ალექსი
დახლში ზის და გაზეთს კითხულობს, ნიკალა კი ბოლთას სცემს და, ეტყობა,
რომ ვიღაცას ელის. გარედან მოისმის ყრუ ყრიაშული და რევოლუციური სიმ-
ღერები. დროდადრო კანტიკუნტი სროლა. კიბეზე ჩამორბის ბეგო.

ბეგო. გამარჯობა, ნიკალა!

ნიკალა (შეუბღვერს). შე ყურუმსალო, სადა ხარ აქამდის?
ეხლა ველარც დაგხატავ.

ბეგო. რატომ?

ნიკალა. იმიტომ, რომ... ნიჭი დამეღალა შენს მოლოდინში...

ბეგო. რა ვქნა, ძმაო... ძლივს მოვალწიე... აგერ, ქუჩებში რა
ამბავია...

ნიკალა. მაშინ სულაც ნუ მოხვიდოდი...

ბეგო. ვაჰ, როგორ არ მოვსულიყავ, როცა, ჯერ ერთი, აი ეს
ფული უნდა მომეცა. (ჯიბეში ფულს ჩაუღებს.)

ნიკალა. ეს რა ფულია?

ბეგო (ეშმაკური ღიმილით). იმ შენმა ნაცნობმა მანდილოსან-
მა გამოგიგზავნა...

ნიკალა (მოიღუშება). წაუღე უკან! მე აქ გლახა კი არა ვარ!..

ბეგო (ფულს ისევ ჯიბეში ჩაუღებს). ვაჰ, შე დალოცვილო
ხუმრობა ველარ გაგიგია? ჰამქრის დროშა რომ მოგვიხატე, ეს იმის
გასამრჯელოა.

ნიკალა. ჰმ... ეგ სხვა არის...

ბეგო. მეორეც, იმ ბიჭმა არსენა ჯორჯიაშვილმა შემოგიტვალა,
მაღე მოვალ და ძია ნიკალა იქ დამხვდესო.

ნიკალა. მობრძანდეს.

ბეგო. მესამეც, ჩვენმა ჰამქარმა გადაწყვიტა შენთვის ახალი

ჩოხა-ახალუხი გვეყიდნა, მაგრამ მოგვაგონდა, რომ „გრაფი“ ბრძანდები, და აი ეს მოგართვით... (ახალ პიჯაკს წამოასხამს მხრებზე).

ნიკალა (ნასიამოვნები ჩაიღიმებს). ჰმ... რა ხალხი ხართ! დიდი მადლობა... (უცებ ისევ აიძრისება.) მაგრამ დახატვით მაინც ვერ დაგხატავ...

ბეგო. ნიკალაჯან! შენ კარგად იყავ და — მე ისედაც დახატული ვარ! (სამიკიტნოში ჩამოდის არსენა ჯორჯიაშვილი კალათით ხელში.) აგერ, ის ბიჭი არსენაც მოვიდა... აბა, ნახვამდის... (გადის.)

არსენა (ჩურჩულით). გამარჯობა, ძია ნიკალა...

ნიკალა. გაგიმარჯოს!

არსენა. ის ჩვენი საქმე როგორ არის, ჰა?

ნიკალა. ძალიან კარგად... უკვე მოვხატე... (სამზარეულოში შედის და შეხვეულს გამოიტანს. ამ დროს სამიკიტნოში შეიშლის პროხორი; ალექსი მას მიეგებება, არაყს დაუსხამს. პროხორი ეჭვის თვალთ გამოსცქერის ნიკალასა და არსენას, მაგრამ ალექსი გაზეთში რაღაცას უჩვენებს და ყველანაირად ცდილობს მისი ყურადღება ნიკალასა და არსენას მოაშოროს.)

არსენა (საიდუმლოდ). არა, ძია ნიკალა... ეგ დროშა შენ უნდა ეხლავ სხვა კაცს გადასცე...

ნიკალა. ვინ კაცს?

არსენა. აი ასე ილღიაში ამოიდე და აქვე, ხაზინასთან, ბაღის კუთხეში დადექ...

ნიკალა. მერე?

არსენა. მერედა, შენთან კაცი მოვა და გკითხავს, ღვინო გირჩევნია თუ არაყიო...

ნიკალა ბიჭოს!

არსენა. ჰო, ძია ნიკალა! ეს პაროლია! შენ ეტყვი, ლუდი მირჩევნია-თქო, და ის კაცი მაგ დროშას გამოგართმევს...

ნიკალა. შენა?

არსენა (მრავალმნიშვნელოვნად ჩაიღიმებს). მე... სხვა დავალება მაქვს... ეხლავე უნდა გავეშურო...

ნიკალა. რა დავალება?

არსენა. არის ერთი რამ...

ნიკალა. ჰა, შენ რაღაც სხვანაირად ლაპარაკობ! ტყუილუბრალოდ თავი არ დაიღუპო...

არსენა. არა, ძია ნიკალა! რევოლუციონერები არ იღუპებიან! ისინი თავსა სწირავენ რევოლუციის გამარჯვებას და მერე ხალხი მათზე სიმღერებს მღერის...

ნიკალა. ბიჭო, რას ამბობ?.. რა თავგანწირვაზე ლაპარაკობ?

არსენა. ჰო, ჰო, ძია ნიკალა! აი, რევოლუცია რომ გაიმარჯ-
ვებს, იცი, შენთვისაც რა ძალიან კარგი იქნება!.. შენისთანა ღარიბ-
ლატაკი მუშა მხატვარიც იმწამსვე წელში გასწორდება... მილიონე-
რები რომ დიდ ბინებში გაბრტყელებულან — სწორედ იქ შეგასახ-
ლებენ ნათელ დარბაზში და საუკეთესო საღებავებს, ყველა მასა-
ლას მუქთად მოგცემენ... აი მაშინ ხატე და ხატე ხალხისათვის,
რამდენიც გნებავს...

ნიკალა. შვილო, ღმერთმა გისმინოს, მაგრამ...

არსენა. მაგრამ რა?

ნიკალა. ეს ჩვენი საწყალი ერი? ისევ ასე ყმად უნდა დავრ-
ჩეთ?..

არსენა (გადიხარხარებს). რას ბრძანებ, ძია ნიკალა! აბა მაშ
რიღასთვის ვიბრძვით, თუკი ისევ მონად დავრჩებით...

ნიკალა. შვილო, მე მაინც შენი ბოღმა მაწუხებს... სად მი-
დიხარ? რაზედ მიდიხარ?

არსენა. არა, ძია ნიკალა! მაგას ვერ გეტყვი...

ნიკალა. ბიჭო, იქნებ მეც დაგეხმარო?!

არსენა. არა, არა! სუყველაფერს მალე გაიგებ... ისე კი, ძა-
ლიანა გთხოვ... ამ საღამოსვე დედაჩემი ინახულე და... ასე უთხარი...
(მორცხვად ჩაიღიმებს, გარინდდება.)

ნიკალა. რა ვუთხრა, ბიჭო?

არსენა. თუმცა, რას ეტყვი... მხოლოდ, ეს კი უთხარი, შენმა
არსენამ ქვეყანას ჭირი მოაშორა და... ნუ, ნუ ინაღვლებ, ჩემო
ტკბილო დედი-თქო.

ნიკალა. შვილო... ბიჭო... ეს რა განგიზრახავს?!

არსენა (გამოერკვევა, საათს დახედავს). უჰ, უკვე დროა.. აბა,
მშვიდობით, ჩემო საყვარელო ძია ნიკალა! (სასწრაფოდ გადაეხვე-
ვა და გადაკოცნის.) ჩემი თხოვნა არ დაგავიწყდეს!.. (გარბის.)

ნიკალა (თვალცრემლიანი გასცქერის). ბიჭო არსენ... შვილო,
სად მიხვალ... (უცებ გამოერკვევა, შეხვეულ დროშას იღლიაში ამო-
იღებს და საჩქაროდ გადის სამიკიტნოდან. უცნობი, რომელიც კუ-
თხეში თავს იმძინარებდა, სასწრაფოდ წამოხტება და პროხორთან
მიიჭრება.)

უცნობი. ბატონო პროხორ! ეხლავე სასწრაფო ზომები უნდა
მივიღოთ...

პროხორი. რის თაობაზე?

უცნობი. ის ახალგაზრდა აშკარად ტერორისტია. აი ეხლაც
სადღაც გაიქცა.

პროხორი. მართლა? კი, მაგრამ რა საქმეზე?

უცნობი. რა მოგახსენოთ!.. საჩქაროდ უნდა ავედევნოთ...
პროხორი. მაშ ჰარიქა, სწრაფად! (პროხორი და უცნობი
გავარდებიან სამიკიტნოდან. შეშფოთებული ალექსი დახლიდან გა
მოდის, კარებისაკენ მიდის და სწორედ ამ დროს გარედან მოისმის
ყუმბარის აფეთქების საშინელი გრიალი, ხალხის წივილ-კივილი
პოლიციელთა საგანგაშო სტვენა და ცხენების თქარათქური. სამი
კიტნოში ჩამორბის თავზარდაცემული ივანიკა.)

ივანიკა (გულშემოყრილი). ვაიმე... ეს რა ვნახე!

ალექსი. რა მოხდა, ბიჭო?

ივანიკა. ბატონო, ყუმბარა ესროლეს...

ალექსი. ვის ესროლეს, ბიჭო?

ივანიკა (გაოგნებული). მოკლეს, ბატონო!

ალექსი. ხეირიანად გამაგებინე, ვის ესროლეს, ვინ მოკლეს
მეთქი?

ივანიკა. გენერალი ააფეთქეს...

ალექსი. ვინ გენერალი?

ივანიკა. გენერალი გრიაზნოვი... აი ასე ვუყურებდი.. სახლო
დან რომ გამობრძანდა და ეტლში ჩაჯდა, უცებ არსენა გამოვარდა
საიდანღაც...

ალექსი. ვინ არსენა?

ივანიკა. აი ის, ძია ნიკალასთან რომ მოდის ხოლმე... ჰოლ
ეტლქვეშ იმ გენერალს ბომბი დაურტყა... იფეთქა, მაგრამ რა იფეთ
ქა!.. ეტლი, ცხენები, გენერალი სულ ჰაერში ავარდა... სულ ნაფ
ლეთებად იქცა... (სახეზე ხელებს მიიფარებს.) ვაი, ეს რა ვნახე...
ეს რა ვნახე, ბატონო...

ალექსი. თვითონ არსენა?

ივანიკა. ალექსანდრეს ბაღში გადახტა... ჯარისკაცები გამო
უდგნენ... მე კი აქეთ გამოვიქეცი...

(სამიკიტნოში ჩამორბის ძალზე შეშფოთებული ნიკალა, რომელსაც კვალდაკვ
ლად ჩამოსდევენ ბოქაული, პროხორი და უცნობი.)

უცნობი (ნიკალაზე უჩვენებს). აი ეს გახლდათ, ბატონო ბო
ქაულო! სულ ამას ეჩურჩულებოდა... ესეც აშკარად მისი თანამონა
წილეა. ის დროშები კი აი ამ სამზარეულოდან გამოაქვს ხოლმე.

ნიკალა. ბატონო, მე მხატვარი ვარ.

ბოქაული (გაცოფებული), უუ, შე ყაჩაღო! მშვენივრად გი
ნობ, რა მხატვარიც ხარ, შე არამზადავ! ეხლა კი გიჩვენებ სერი
შე ავაზაკო! (პროხორს.) სასწრაფოდ ჟანდარმერიაში! (უცნობს
შენ კი მთელი ეს დუქანი გაჩხრიკე ეხლავე!

(პროხორს ნიკალა გაჰყავს.)

მოქმედა მეოთხე

სურათი მეცხრე

იგივე სამიკიტნო, რომლის კედლებზეც მოჩანს ფიროსმანის კიდევ ახალი სურათები. ზაფხულის სიციხიანი ღლეა და ვალებულ კარში მოჩანს გამკვლელთა ფეხები. დახლის წინ მაგიდას უსხედან ნიკალა და ალექსი — ორივენი უკვე კარგად შებერებულნი. დავაუკაცებელი ივანიკა კი უკვე დახლიდრობს და შემოსულ მუშტრებს უძღვება. ნიკალა უარესადაა გამხდარი და გალახული. იგი არაყს ეძალება და მწარე ფიჭვებშია ჩაძირული.

ალექსი (როლშია შესული). „ვეფხისტყაოსანი“ — აი შენ რაზე უნდა იმუშაო ეხლა! დავით ყაზაროვს ხომ დაუსურათე „ყარამანიანი“... ეხლა ეს იქნება შენთვის ყველაზე დიდი და სასახლო... ჰა, შენ რას იტყვი?

ნიკალა. (გარინდებული). „ბრძნად მეტყველება ვერცხლია წმინდა, ხოლო დუმილი — ოქრო რჩეული“...

ალექსი. კაცო, ძმაო... მე რაზედ გელაპარაკები და შენ რა პასუხს მაძლევ... ეგ რა შუაშია?!

ნიკალა (ყურადღებას ძაბავს, ცდილობს თავი დააღწიოს გარინდებას). ჰო, ჰო, შენ მართალს ამბობ... (კვლავ გარინდებაში იძირება.) ყველა ადამიანის უბედურების დასაბამი მისსავ გულშია...

ალექსი. დიდება შენდა! ძმაო, რაებს ამბობ! (მხარზე ხელს დაადებს, შეაჯანჯლარებს.) დედამიწაზე ჩამოდი, ნიკალ!

ნიკალა (გონს მოდის). ჰო, ჰო, შენ რაღაცას მეუბნებოდი...

ალექსი. რა ვქნა, ძმაო, გეუბნებოდი, მაგრამ რომ არ მისმენ...

ნიკალა. იმიტომ, რომ... ლამის გულის ძაფი გამიწყდეს... ლამის დავეცე... (თავი მაგიდაზე დაუფარდება.)

ალექსი. ბიჭო ივანიკა... არიქა, წყალი! ბოლმისაგან ისევ გულზე შემოეყარა.

ნიკალა (თავს წამოსწევს, გასწორდება). არა, არა, წყალი არ

მინდა! სულ ამ ოხერი არყის ბრალია. ისე ვარ, როგორც მოწამ-
ლული.

ალექსი. ჰოდა, შენც ნუ სვამ... რამდენჯერ გითხარ... აი, ხომ
ხედავ, გულყრაც დაგეწყო...

ნიკალა. რა ვქნა... ვერა ვძლებ... რომ არ დავლიო, უარესი
დამემართება.

ალექსი. შე კაი კაცო... იქნებ გგონია, რომ დარდს გაგიქარ-
ვებს, ანდა გულს ბოღმა მოგეშვება...

ნიკალა (ნაღვლიანად). ძმაო ალექსი... განა მიტომ ვსვამ,
რომ ვიგემო სიტკბო და შვება, ან დავივიწყო ჩემი ბოღმა, დარდი
და ვნება... არა, მე მინდა წუთით მაინც ჩემს თავს მოვშორდე-
თავდავიწყება მენატრება, თავდავიწყება... (მაგიდაზე დაემხობა.)

ალექსი. ჰოდა, მეც სწორედ მაგას გეუბნებოდი, რომ ეგ თავ-
დავიწყება ისევ შენს საყვარელ ხატვაში უნდა ეძებო... სხვა გზა არა
გაქვს...

ნიკალა. რაში?... ხატვაში? ჰმ... რისთვის? რილასთვის? ამდე-
ნი სიღუბჭირე, დაცივნა და დამცილება გამოვიარე... რაც მე იმ
წყვეთულ ჟანდარმებმა მცემეს და მტყიპეს... და აი ვფიქრობ, განა
ღირდა ამ ზღვა წამებად აი ეს ჩემი ნაბლახნები, რასაც მე მთელი
სიცოცხლე შევალე. (წამოდგება და თავის სურათებს ჩამოუვლის,
აშტერდება.)

ალექსი. შე კაი კაცო! რატომ არ ღირდა... მთელი თბალისის
სამიკიტნოები შენი სურათებითაა გამოჭედილი...

ნიკალა (ხელს ჩაიქნევს). ეეჰ.. მაგას რა აზრი აქვს... ბევრია,
მაგრამ ვარგა?... აი, გულს რა მიღრღნის... იქნება მართლაც ყვე-
ლაფერი ეს სისულელეა და სანაგვეზე ვადასაყრელი... იქნებ
მკვდარს უფრო მწარედ დამცინონ...

ალექსი. მოიცა ერთი!.. მიაფუროთხე მაგ მავნე ფიქრებს... გე-
უბნები „ვეფხისტყაოსნის“ დასურათებას შეუდექ-მეთქი... რამდე-
ნი ხანია ამასა ნატრობ...

ნიკალა. არა, არა, მაგაზედ ფიქრიც კი მეზარება... ნეტავ ესე-
ნიც არ დამეხატნა... აი ამ აბრასაც დაგიმთავრებ და მერე კი...
(არაყს გადაკრავს, აკანკალებული ხელით პაპიროსს მოუკიდებს და
გადის. კიბეზე შეეჩხება კარგად ჩაცმულ ორ ახალგაზრდას —
კირილს და მიშელს, რომლებიც სამიკიტნოში ჩამოდიან და ფიროს-
მანის სურათებს სინჯავენ ხარბად.)

კირილი. ის არის, ისა!.. მის ხელს უკვე ვცნობ...

მიშელი. ოჰო, აქ ყველაზე მეტი ყოფილა... პირდაპირ მაღანს
მივაგენით... შეხედე, კირილ, აი ეს „ორთაჭალის ტურფა“, გოიას

„მახას“ არ მოგაგონებს?.. (უცებ აღტაცებული.) კირილ! შეხედე ამ შავ ლომს!.. რა დიდებულია!.. არა, ძმაო, ამის დამხატავი ასურული ბარელიეფების მემკვიდრეა...

კირილი. მოკლედ, ეს ვილაც ფიროსმანი ფერწერის დიდი პოეტია...

მიშელი. ჰოდა, შევუდგეთ... (მაგიდას მიუსხდებიან, ალექსი მიუახლოვდება).

ალექსი. რა მოგართვათ?

კირილი. ცივ-ცივი ღვინო და ორი მწვადი...

ალექსი. ეხლავე, ყმაწვილებო... (წასვლას აპირებს.)

მიშელი. მოითმინეთ! ცოტა ხანს აქ დაბრძანდით. (ალექსი ჩამოჯდება.) ბატონო, ამ სამი დღის წინ ჩვენ ერთ სამიკიტნოში შევედით და იქ ისეთი შესანიშნავი სურათები ვნახეთ, რომ უაღრესად დავინტერესდით...

კირილი. ჩვენ გვითხრეს, რომ სხვა სამიკიტნოებშიც ამ მხატვრის ბევრი სურათებიაო...

ალექსი. მართალი უთქვამთ...

მიშელი. ჰოდა, ამ სამ დღეს ჩვენ ბევრი სამიკიტნო შემოვიარეთ და იმ მხატვარს კი ვერსად ვერ შევხვდით.

კირილი. არავინ იცის, სადა ცხოვრობს...

მიშელი. თქვენთან მოგვასწავლეს, ის თუ მიგაგნებინებთ, რადგან იმასთან ბინადრობსო...

ალექსი. ეხლა უკვე აღარ ბინადრობს...

კირილი. რატომ?

ალექსი. იმიტომ, რომ როცა ციხიდან გამოუშვეს...

მიშელი. ციხეში იჯდა? რისთვის?

ალექსი. ამ ექვსი-შვიდი წლის წინათ რევოლუციონერებს ეხმარებოდა... დროშებს უხატავდა... ამიტომ ჩასვეს... სხვა ვერაფერი დაუმტკიცეს, თორემ კატორღა არ ასცდებოდა...

კირილი. აა!..

ალექსი. ჰოდა, მას შემდეგ ჩემთან ყოფნა აღარ ისურვა... კიდევ შარში არ გაგხვიოო...

მიშელი. ეხლა სად ცხოვრობს?

ალექსი. რა მოგახსენოთ... ამბობს, სადღაც სადგურის ახლოს ბნელი სარდაფი ვიჭირავეო...

კირილი. ვერ მიგვასწავლით?

მიშელი. ძალიან გვინდა მისი ნახვა...

ალექსი. ეგ ადვილია... მით უფრო, რომ თქვენ უკვე ნახეთ...

კირილი. როდის? სად?

ალექსი (ლიმილით). აი ამ კიბეზე რომ ჩამოდიოდი...

მიშელი. ის ჩამოგლეჯილი, გაუპარსავი მოხუცი კაცი?

ალექსი. ღიას!... აგერ, აბრას მიხატავს... (ფანჯარაში გასხედებს.)

მიშელი. ძალიანა გთხოვთ, აქ მოიყვანეთ...

ალექსი (კარებში გასძახებს). ნიკალა, ბიჭო!.. ჩამოდი აქ... შენ გკითხულობენ... ვინ არიან და — ვილაც კარგი ახალგაზრდები... შენი ნახვა სურთ... (სამიკიტნოში ჩამოდის ნიკალა დაღვრული სახით. კირილი და მიშელი ფეხზე წამოდგებიან, განცვიფრებით შეჰყურებენ მას.)

კირილი. მობრძანდით, ბატონო ნიკო!.. (მოწიწებით ხელს ართმევს.)

მიშელი (სკამს მიუდგამს). აი აქ დაბრძანდით, ბატონო ნიკო... (ნიკალა სკამზე ჩამოჯდება.)

კირილი. ჯერ ნება მიბოძეთ ჩვენი თავი წარმოგიდგინოთ... ჩვენ გახლავართ პეტერბურგის სამხატვრო აკადემიის მესამე კურსის სტუდენტები...

მიშელი. ეს თბილისელი რუსი გახლავთ... სახელად კირილი... ძალიან უყვარს საქართველო...

კირილი. ეს კი ჩემი მეგობარია... ფრანგი გახლავთ... არდადეგებზე სტუმრად ჩამოვიყვანე...

ნიკალა. ძალიან სასიამოვნოა...

მიშელი. ბატონო ნიკო!.. ჩვენ თქვენი ნიჭის დიდი თაყვანისმცემლები ვართ...

კირილი. ეს სამი დღეა სულ სამიკიტნოებში დავდივართ და თქვენს სურათებს ვეძებთ... ზოგი მათგანი უკვე ვიყიდეთ კიდეც...

მიშელი. ბატონო ნიკო, თქვენი სურათები ხელოვნების შესანიშნავი ნიმუშებია... თქვენ არც კი იცით, რა დიდი ოსტატი ბრძანდებით ფერწერისა...

ნიკალა (უფრო მოიღუშება). ყმაწვილო, რათა გგონია, რომ მე ეგ არ ვიცი?! (ალექსის.) ჰმ, ხედავ, ალექსი, ეს ღლაპები რა ეშმაკურად დამცინიან!.. (ახალგაზრდებს.) რა გინდათ, შვილო... მე ხომ ძალად არას გაწონებთ... ერთი უსწავლელი კაცი ვარ და რაც შეეძება, ის გავაკეთე... ძალიანა გთხოვთ, დასაციხს და შეურაცხყოფელს ნულარას მეტყვიით, თორემ ეს ჩემი გული ვეღარ აიტანს... (წამოსადგომად წამოიწევს, ყმაწვილები მისცივდებიან.)

კირილი. ბატონო ნიკო! დაცინვას როგორ გავიბედავთ! პირიქით!.. ჩვენ მით უფრო ვართ ალტაცებული, რომ თქვენ, უსწავლელმა, რაღაც არაჩვეულებრივი ინტუიციით ეპოქის ახალ სტილს მიაგენით.

მ ი შ ე ლ ი. დიახ, დიახ, ჩვენ ის გვაკვირვებს, რომ თქვენ, ვისაც არც მხატვრული ტექნიკა გისწავლიათ და არც მუშაობის პირობები გაქვთ, თქვენ მიერ სახელდახელოდ შეთხზულ საღებავებით, უბრალო მუშაობაზე და თუნუქის ჟანგიან ფურცლებზე ასეთი შესანიშნავი სურათები დახატეთ...

კ ი რ ი ლ ი. ბატონო ნიკო!.. ამ სამ დღეში ჩვენ უამრავი თქვენი სურათი ვნახეთ და ჩვენ წინაშე გადაიშალა მზიანი, ბარაქიანი საქართველო... მისი წარსული... მისი აწმყო... მისი მომხიბვლელი პეიზაჟები... თქვენ ნამდვილი ეროვნული მხატვარი ბრძანდებით.

მ ი შ ე ლ ი. მე უკვე სტატიას ვამზადებ თქვენზე ჩვენი პარიზის გაზეთისათვის. მე იქ ვწერ, რომ თქვენ ჩვენს სახელგანთქმულ პრიმიტივისტებს არ ჩამოუვარდებით...

კ ი რ ი ლ ი. სცდები, მიშელ! მეც ვწერ სტატიას ჩვენი პეტერბურგის გაზეთისათვის და იქ ვამტკიცებ, რომ ბატონი ნიკო გაცილებით უფრო მაღლა დგას, ვიდრე ის თქვენი პრიმიტივისტები...

მ ი შ ე ლ ი (სურათებს აკვირდება). ჰმ... შესაძლოა... კირილ, მგონი შენ მართალი ხარ!

კ ი რ ი ლ ი. მგონი კი არა, ნამდვილად, ჩემო მეგობარო!.. იმათ სურათებს ხელოვნურობის აშკარა ბეჭედი აზის... აქ კი ბუნებრივი, ჭეშმარიტი ხელოვნებაა...

ა ლ ე ქ ს ი. (გახარებული, ნიკალას მოეხვევა). ყოჩაღ, ნიკალა! გესმის, ბიჭო, შენს თავს რა ამბავია... მომილოცნია, ძმაო... (ჰკოცნის.)

ნ ი კ ა ლ ა (ნასიამოვნები ჩაიღიმებს). მე კი მგონია, რომ აჭარბებთ, ყმაწვილებო...

მ ი შ ე ლ ი. ბატონო ნიკო! თუ ჩვენი გულწრფელობისა არა გჯერათ, მაშინ აი რას შემოგთავაზებთ: პარიზში წამობრძანდით! მე გეპატიჟებით! ყველა ხარჯებს მე ვკისრულობ... იქ ერთ წელიწადს იმუშავებთ, აი ასევე აგვისახეთ ჩვენი პარიზი და სრულ გარანტიას გაძლევთ, რომ ერთი წლის შემდეგ უკვე საქვეყნოდ ცნობილი მხატვარი გახდებით და ბანკშიც ერთ მილიონამდე ფრანკი გექნებათ! ჰა, თანახმა ხართ?

ნ ი კ ა ლ ა. არა...

მ ი შ ე ლ ი. რატომ? მე ვიცი, რომ თქვენ აქ არც ცოლ-შვილი გყავთ... არც სამუშაო პირობები გაქვთ... ეს თქვენი ხალხიც არ ფასებთ, როგორც გეკუთვნით... ჰოდა, ვერ გამიგია, რა არ გეთიობათ?

ნ ი კ ა ლ ა. ჩემი ქვეყანა... ჩემი თბილისი... იგივე ჩემი ტანჯული ხალხი, რომელსაც ჯერ ჩემთვის არა სცალიან...

მიშელი. კი, მაგრამ ხომ დაბრუნდებით! წასვლით რას
გავთ?

ნიკალა. არა, ყმაწვილო! ოცი წლის წინ რომ მოსულიყავით
მაშინ კიდევ ჰო! ეხლა კი... უკვე მშობელი მიწა მეძახის...

კირილი. ბატონო ნიკო, რა გული გაგტეხიათ!

ნიკალა. გული კი არა, შვილო, უკვე სიცოცხლე გატყდა...
რა ვქნა, ყმაწვილო... ქართველი კაცის ადათ-რჯული ასეთი არის...
როცა მოკვდება, ძალიან უყვარს თბილისის მიწის საბნად წახურება...
პარიზის მიწა მე ვერ გამათბობს... (მორცხვად ჩაიღიმებს, მაღალ
ლად ცრემლს მოიწმენდს.)

მიშელი. რა გაეწყობა! რაკი ეგრეა, მაშინ ეს თქვენი სურათი
ბი მაინც უნდა მოგვეციდოთ.

ნიკალა. ეგ სურათები ჩემი არ არის.

კირილი. როგორ? განა ესენი სხვამ დახატა?

ნიკალა. არა! ჩემი დახატულია, მაგრამ... მე არ მეკუთვნის...

ალექსი. ვაჰ, რას მიჰქარავ! მაშ ვის ეკუთვნის?

ნიკალა. შენ! ეს სურათები, ჩემო ალექსი, იმ დიდი სიკეთის
საზღაურია, რაც შენგან მახსოვს...

ალექსი. ეე, რაებს ამბობ! შენია და შენვე გაყიდე... მხოლოდ
იცოდე, აი ამ „სააღდგომო კრავს“ მე არავის არ დავანებებ...

მიშელი. თქვენ რისთვის გინდათ!

ალექსი. ვაჰ, როგორ თუ რისთვის... რაც უნდა გაცეცხლე
ბული ვიყო, ამ სათნო თვალებს რომ შევხედავ, იმწამსვე გულ
დაცხრება ხოლმე.

ნიკალა (ყმაწვილებს). მოკლედ, ამას ევაჭრეთ... ეს სურათები
მაგისია. მე კი ფასად და ჯილდოდ ისიც მეყოფა, რაც თქვენ მითხ
რით... ასეთი რამ ჯერ ჩემთვის არავის უთქვამს... ძალიან დიდი მად
ლობელი ვარ...

კირილი. ბატონო ნიკო...

ნიკალა. დიახ, დიახ! რა ვიცი, იქნებ მატყუებთ კიდევ. გულ
მიკეთებთ მოხუცებულ კაცს, მაგრამ მე მაინც დიდი მადლობელი
ვარ. ასეთი დიდი სიხარული ჩემს სიცოცხლეში არა მქონია. (გულ
აჩუყებული წამოსადგომად წამოიწევს, მაგრამ წატორტმანდება და
გონწასული ჩაიკეცება. ყველანი მისცვივდებიან.)

ალექსი. ბიჭო ივანიკა! პარიჯა, წყალი! ისევ გულზე შემო
ყარა... ეხლა კი უკვე სიხარულისგან!

ს უ რ ა თ ი მ ე ა თ ე

ფარდის ახლისას სცენაზე სრული სიბნელეა. ამ სიბნელიდან მოისმის ნიკალას ხველება და მის მიერ ლოცვასავით სასოებით წარმოთქმული სიტყვები.

ნიკალა.

ამ წყეულ დრომ
დამწვა ველურ აკლებით...
ქადართაც რა ადრე შევივერცხლე!
რით ვიყავი სხვა ბიჭებზე ნაკლები,
რომ წყეულ დრომ
დამწვა ველურ აკლებით!..
რა უდროოდ და უმსგავსოდ დავბერდი...
ხელში შემჩა
დამსხვრეული სიცოცხლე,
გული სავსე ბოლმითა და დარდებით...
რით ვიყავი სხვა ბიჭებზე ნაკლები,
რომ დავდივარ თბილისში გულჩამკვდარი
როგორც გობის უდაბნოში აქლემი... (შფოთავს, ახველებს.)
სად ვეძებო ჩემი კუბოს ფიცრები...
რომელ ტყეში ნეტავ რა ხე შრიალებს,
ფოთლები აქვს თუ ნემსივით წიწვები,
მოჭრილია თუ ისევ დგას შრიალით?
რა ჯურის და რა ჯიშის ხეხილია,
ან იქნება უკვე დახეხილია?..
იქნებ რიყის მორია ნუჟრიანი?..
რომ მაჩვენონ, თრთოლვით გამაყრიალებს,
მღუღარებით გულშივე ჩავიწვები...
რომელ ტყეში ნეტავ რა ხე შრიალებს,
ფოთლები აქვს თუ ნემსივით წიწვები.
ჩხეში დგას თუ კენწერს წვიმა ეცრება.
სად ვეძებო ჩემი კუბოს ფიცრები.
(მოისმის კარზე კაკუნი.)

ნიკალა (შემკრთალი ხმით). ვინ არის?

ხმა გარედან. მე ვარ, ბატონო ნიკო... მხატვარი ლადო...

ნიკალა. შენ რა იცი, რომ აქ ნიკალა ფიროსმანია?

ხმა გარედან. ვიცი, ბატონო... მთელი კვირაა თქვენ დაგეძებთ... ძლივს მოგაგენით... თქვენთან საქმე მაქვს...

ნიკალა. მოიცა ცოტა... (ასანთს ვაჭკრავს და ააბუუტებს ნავთის პატარა ლამპას, რომლის მკრთალი შუქიც გაანათებს ნიკალას უბადრუკ სადგომს. შემდეგ წამოდგება იატაკიდან, რომელზედაც იგი იწვა, მივა კართან, რომ გააღოს, მაგრამ შედგება და შეეჭვებულის დაეკითხება.) მართალი მითხარ, სამტროდ მოსულხარ თუ სასიკეთოდ?

ლადო ს მ ა. სასიკეთოდ, ბატონო ნიკო! აბა სამტრო რა უნდა მქონდეს...

ნიკალა ჰოო?.. თუ სასიკეთოდ — მაშინ მობრძანდი... (აკანკალებული ხელით კარს გააღებს. შემოდის ახალგაზრდა ქართველი მხატვარი ლადო, რომელსაც ნიკალა ჩაცვებით აკვირდება.) ვინ, ვინ ბრძანდები?..

ლადო. მხატვარი ლადო... გახსოვთ, შარშან ქართველ მხატვართა საზოგადოებაში რომ წაგიყვანეთ... ნუთუ არ გახსოვთ?..

ნიკალა (ვერ იგონებს, მაგრამ არ იმჩნევს). ჰმ, დიას, დიას... (აკანკალებული ხელებით თვალებს მოიფშვნეტს.) მობრძანდი, აი აქ დაბრძანდი... (ნახევრად დამტვრეულ ყუთზე მიუთითებს, დაგლეჯილ ჩულს მხრებზე წამოისხამს).

ლადო (ფრთხილად ჩამოჯდება). ბატონო ნიკო... ნუთუ სამტროდაც მოდიან თქვენთან?

ნიკალა. ოო, როგორ არა!.. ძალიან ბევრნი... ბავშვები სულ ქვებს მესვრიან... ღამით კი... ვილაც მავნე აიტუზება ხოლმე ამ ჩემს კართან და საზარლად შემომყმუის...

ლადო. ბატონო, ალბათ გეჩვენებთ...

ნიკალა. არა, არა! ეს ნამდვილია... თუმცა... შენ ამით რად გაწუხებ... კაცი სტუმრად მოსულხარ... (დაფაცურდება, ბოთლებს სინჯავს ლამპის შუქზე.) რა ვქნა, არაყი სულ აღარა მაქვს... (ტოლხით წყალს მიაწვდის.) ძალიანა გთხოვ, აი ეს წყალი მაინც მიირთვი... ჰო, შენ რა გქვიან?

ლადო. ლადო!

ნიკალა. ჰო, ჰო, ლადო, ლადო! (კედელზე მიკიდულ პატარა კარადაში რაღაცას ეძებს.) აი აქ პურის ნატეხიც მქონდა. ჰო, აი სად ყოფილა... (პურის ხმელ ნატეხს მიაწვდის.) მიირთვი, ლადო-ჯან... პირი ჩაიგემრიელე...

ლადო. არა, ბატონო ნიკო... მე არცა მშიან და არცა მწყურრიან...

ნიკალა. თუ ძმა ხარ, პურ-მარილზე უარს ნუ მეტყვი... (ლადო წყალს მოსვამს.)

ლადო. თქვენ ეს მითხარით, როგორ ბრძანდებით?

ნიკალა. კი არ „ვბრძანდები“, ძალივით ვგდივარ... აი, ხომ ხედავ... (თავის ძონძებზე მიუთითებს.) ამ მარტოობამ ხომ სული წაიღო... სულ გვერდით მიზის, როგორც ყრუ-მუნჯი დედაბერი... (ახველებს, ტანი უცახცახებს, ჩულში ეხვევა.)

ლადო. ბატონო ნიკო! თქვენ ავადა ხართ... მე ეხლავე ექიმს მოგიყვანთ...

ნიკალა. არა. არა! საეჭიმო არაფერი მჭირს... ჩემს სიცოცხ-
ლეში ეჭიმებთან არა ვყოფილვარ... ეს კია, რომ სულ აი ასე ძნე-
ლად მახველებს და სულ თავბრუ მესხმის... (უცნაურად გადაიხარ-
ხარებს.)

ლადო. ბატონო ნიკო, მე ისე გატყობთ, რომ დიდი სიცხე
გაქვთ...

ნიკალა. ჰოო?... ალბათ მექნება... ეს სამი დღეა თავი მტკიცე
და ტანში სულ მამტვრევს... მთელი ღამე სულ მაცივ-მაციხელებს,
მაგრამ... არაფერია... ძალი კოჭლობით არ მოკვდება.

ლადო. ბატონო ნიკო, თავს გაუფრთხილდით... ეგ სახუმარო
საქმე არ არის... მე ეხლავ წავალ და ქართველ მხატვართა გამგეო-
ბას მოვახსენებ... ალბათ ხვალ უკვე მოგაკითხავენ... იქამდისინ კი
აი ეს ოცი თუმანი გქონდეთ...

ნიკალა (ფულს გამოართმევს). ეს რა ფულია?

ლადო. ქართველ მხატვართა მცირე დახმარება... სამწუხაროდ,
ჩვენი უსახსრობით ამაზე მეტი ვერ მოგიხერხეთ...

ნიკალა (ნასიამოვნები და გულაჩუყებული). კი, მაგრამ... რა
გამიკეთებია!.. რით დავიმსახურე...

ლადო. რითა და, თქვენი უებრო ნიჭით... თქვენი დიდი შრო-
მითა და თავდადებით... უნდა გახაროთ, რომ თქვენი თავყანისმცე-
მელთა წრე ძალიან სწრაფად ფართოვდება...

ნიკალა (სიამოვნებით უსმენს). ჰმ... მართლა? აღარც კი მჯე-
რა...

ლადო. ჩვენ უკვე თქვენი სურათების შეგროვებასაც შევუდე-
ქით...

ნიკალა. ღმერთმა აგაშენოთ!

ლადო. ჰო, მართლა! აი გაზეთ „ცნობის ფურცლის“ დამატე-
ბაში თქვენზე წერილია მოთავსებული... (გაზეთს გადასცემს.) აი,
თქვენი პორტრეტიც მოვათავსეთ...

ნიკალა (გაზეთს გამოართმევს, სურათს დასცქერის). ჰმ...
უყურე შენა!

ლადო. მხოლოდ მე ერთი რამ მინდა გკითხოთ, ბატონო ნიკო...

ნიკალა. რა, ჩემო ლადო! მკითხე, რაც გინდა...

ლადო. რით აიხსნება, რომ თითქმის ყველა თქვენი სურათი
სიუჟეტურად და ფერწერის მხრივაც კონტრასტებზეა აგებული?

ნიკალა (მძიმედ). როგორ, ყმაწვილო? ეგ უცხო სიტყვები
კარგად ვერ მესმის...

ლადო. აი, მაგალითად, თქვენს სურათებზე ასეა ხოლმე: უშვი-
ლო მილიონერი ხვდება მრავალშვილიან ლატაკ დედაკაცს. ძროხას

თეთრს ხატავთ — ბუღას კი შავად. ანდა, ორთაჭალის ტურფებს —
თეთრ ტანსაცმელში, ხოლო ფონად კი შავ ფერებს აძლევთ...

ნიკალა. ჰოო... ეხლა კი მესმის... ყმაწვილო, ჩემის გაგებით,
ცხოვრებას თან სდევს თეთრი და შავი... თან სიკეთე — თან ბორო-
ტება... მდიდარნი მუდამ ბედნიერობენ, ლატაკები კი იტანჯებიან.
ძროხა თეთრია, იმიტომ რომ კეთილია... იგი რძეს გვაძლევს... ბა-
ლებს გვიკვებავს... ბუღას კი შავად ვხატავ, რადგან იგი ჩხუბის თა-
ვია... ღმუის, ტორებს სცემს!.. ეს კი ომია! ომი კი მუდამ საზარე-
ლია... საბრალო ტურფებს შავ ფონზე ვხატავ, რადგან მათი ცხოვ-
რება სიდუხჭირია... მაგრამ ისინიც ხომ ეტრფიან სიცოცხლეს და
მის სიამეებს?! ჰოდა, ამიტომ მეც მათ ოცნების ყვავილები მიუხა-
ტე და სინარულის თითო ჩიტი დავასვი მხარზედ. მე ისინი თეთ-
რად დავხატე, რადგან ძალიან მებრალებიან...

ლადო. დიდი მადლობა, ბატონო ნიკო! ეხლა ჩემთვის ყვე-
ლაფერი გასაგებია...

ნიკალა. ეჰ, ჩემო ლადო... ხატვა და მხატვრის ხელოვანობა
ძნელი საქმეა... ვისაც აი ასეთი „ფართუკი“ არ ჩაუცვამს, მხრბო-
ლავი ლამპის მჭვარტლი არ მოუგროვებია, ცარცი და კირი არ დაუ-
ფხვნია საღებავების შესამზადებლად და აი ასეთი უხეში ფუნჯით
არ უხატნია ასეთ ხაოიან მუშაობაზე ამ სიბნელეში, ის ვერასოდეს
ვერ მიხვდება, თუ რა ძნელია შენი გრძნობებით, შენი ოცნებით
და შენის ფიქრით აამღერო და აამეტყველო აი ეს უსულო საღებ-
ავები...

ლადო. ბატონო ნიკო, ეგ რა კარგად თქვით!

ნიკალა. ჰოდა, ლადო-ჯან, ეს ყველაფერი უნდა ითქვას... ერ-
თი დიდი ხის სახლი უნდა ავაშენოთ... შუაში დიდი სამოვარი დავ-
დგათ... ხშირ-ხშირად შევიკრიბოთ და თან ჩაი ვსვათ, თანაც აი
ასეთ რამეებზე ვილაპარაკოთ... მაშინ ბევრი რამ გაირკვევა და ყვე-
ლა ჩვენგანიც უკეთ დახატავს.

ლადო. მართალია, ბატონო ნიკო... თქვენ ეს მიბრძანეთ, ეხლა
რაზედ მუშაობთ?

ნიკალა (დარცხვენილი, შეწუხებული). არაფერზედ... ისეთზე
ადაფერზედ... მინდოდა ამ სიბერის დროს ჩემი საყვარელი „ვეფხის-
ტყაოსანი“ დამესურათებინა, მაგრამ...

ლადო. მაგრამ რა გიშლით?

ნიკალა. რაღა დაგიმალო, ეს ოხერი მარჯვენა აღარ მემორ-
ჩილება... (ხელს ასწევს, რომელიც ძალზედ უკანკალებს.) წინათ
მარცხენას ვაშველებდი და ისე ვხატავდი, მაგრამ ამ ბოლო ხანს ამ
მარცხენაშაც მიღალატა... (უჩვენებს მარცხენასაც, რომელიც ასევე

შანკალებს.) თანაც აქ, ეზოში, ყველა მასხარად მიგდებს... ფანჯრებში ქვებს მესვრიან... (ჩურჩულით.) გიყს მეძახიან.

ლადო. მაშ სულ ველარაფერს ველარ აკეთებთ?

ნიკალა. ეჰ, ვხალიჩობ რაღა. ზოგჯერ მეღუქნეებს აბრებს ვუხატავ. მაგრამ მჩაგრავენ. ერთ ჭიქა არაყს გადმომიდგამენ და... (უცებ ფულს დახედავს და ლადოს ეშმაკურად გაუღიმებს) ლადო-ჯან, იცი რა გითხრა? მოდი, შენი მოსვლის მალარიჩი დავლიოთ ზარემ... აქვე დუქანია... ეხლავ მოვიტან...

ლადო. რას ბრძანებთ, ბატონო ნიკო... ასეთ სიცხიანს ასეთ ამინდში თქვენ კარში არ გაგესვლებათ... (წამოდგება.)

ნიკალა. მაშ მოდი ჩემს მეგობარს ქართველ ალექსას ჩავუჭროლოთ, ჰა?... ერთი ლაზათიანად ვიქეიფოთ! არღნით, დუღუკით... მინდა ჩემი ჭეელობა მოვიგონო... შენი ჭირიმე, უარს ნუ მეტყვი... აი, მე გპატიეებ... (ფულს უჩვენებს.)

ლადო. არა, ბატონო ნიკო, მე ღვინოს არ ვსვამ.

ნიკალა. არც მე! ღვინო რად გვინდა... სულ არაყი ვსვათ!

ლადო. არა, არა, ბატონო ნიკო, მე უკვე წასასვლელი ვარ და ძლიანა გთხოვთ, ამ ფულს სამიკიტნოში ნუ წაიდებთ... დილამდე როგორმე მოითმინეთ და ხვალ კი ჩვენ ყველაფერს გავაკეთებთ, რომ ამ ორმოდან ამოგიყვანოთ.

ნიკალა. დიდი მადლობა, შენი ჭირიმე...

ლადო. ხვალამდის, ბატონო ნიკო... დაწეკით და რაც კი გაქვთ, ზედ დაიხურეთ, რომ არ გაცივდეთ...

ნიკალა. ნახვამდის, შენი ჭირიმე... მანდ ფრთხილად იარე. (ღია კარში ლამპას უნათებს. შემდეგ შემოტრიალდება, ლამპას დადგამს და გაზეთში დაბეჭდილ თავის სურათს დააშტერდება სიხარულით.) მე ვარ... აშკარად მე ვარ... (კითხულობს.) „სახალხო მხატვარი ნიკო ფიროსმანაშვილი“... ჰა, როგორა თქვა?... შენი პატივისცემლები მრავლდებიანო... აჰაი დედასა, ნიკალა ფიროსმანაშვილო! მაშ შენც გელირსა, ბიჭო?! ჰმ.. მაინც შენი გაიტანე, ჰა, შე სახეძაღლო! (გახარებული გადაიხარხარებს, მაგრამ უცებ ხველება აუვარდება, თვალებს შეშლილივით გადმოკაკლავს და იატაკზე დაეცემა.) ვაი, ლამის გული ბუდიდან ამომვარდეს, ვაი, ვიხრჩვები... (ხრიალებს. კარზე ძლიერი რახუნი. ნიკალა თავს წამოსწევს.) ვინ არის?

ხმა გარედან. მე არის!

ნიკალა. ვინ შენა?..

ხმა გარედან. ველარ მიცანის?... მე ხარ, „დვორნიკი“ კირაკოზა!

ნიკალა (კვენესის). ოო, მოხვედი, ჩემო სულთამხუთავო...
ძმაო, ერთხელ ხომ დაგხატე... მეტი რა გინდა...

კირაკოზა (გარედან). სახლის პატრონი ბრძანა, ნიკალა ქი-
რას არ იხდის და უნდა გაგყარო...

ნიკალა. მივცემ, ძმაო... მივცემ... ეხლა ფული მაქვს... ოღონდ
ქუჩაში ნუ გამაგდებთ...

კირაკოზა. მანდ რას ბურტყუნამ... გააღე ჩქარა... აქ კიდე
ერთი ქალი გიკითხებს... (ნიკალა კვენესის და ხრიალებს.) ვაჰ, არ
გესმის... (კარი ხმაურით გაიღება და სარდაფში შემოდის მეეზოვე
კირაკოზა — სწორედ ისეთი, როგორც ეს ფიროსმანის სურათზეა
დახატული.) ეი, ნიკალა, სადა ვარ, კაცო?... (სარდაფს მოათვალიე-
რებს, იატაკზე გართხმულ ნიკალას დაინახავს.) ხვალ დილაზე აქ
შენი „ღუხი“ აღარ იყოს, თორემ შენც გაგყრი და შენი ხარახუ-
რაცა.

ნიკალა (ამოიხრიალებს). ვკვდები, კირაკოზ...

კირაკოზა (შეშინებული ლამპას მიანათებს, შემდეგ ვარეთ
გასძახის). ქალბატონო, ჩქარა ჩამობრძანდის... ნიკალას რაღაცა ამ-
ბავია... მე მინავათ... სახლის პატრონი უნდა მოვახსენო... (გავარ-
დება. სარდაფში ჩქარი ნაბიჯით ჩამოდის შეშფოთებული ვარინკა,
ნიკალასთან მიიჭრება, თავს წამოუწევს, მკერდზე მიიყრდნობს.)

ვარინკა. ჯერ ცოცხალია... სიცხისგან იწვის... (საყელოს უხს-
ნის, წყალს აპკურებს.) რა დაგმართნია, შე საცოდავო... ნიკალა!..
ჩემო ნიკალა!.. თვალეები გაახილე... ნუ გეშინიან...

ნიკალა (თვალეებს გამოახელს). ვინა ხარ?... ვინა?..

ვარინკა. ვარინკა ვარ, შენ შემოგვევლე... (შუბლზედ კოცნის.)
ნუ გეშინიან... ეხლავ გაგივლის...

ნიკალა (უზომოდ გახარებული). ვარინკა, შენა?... (მხარზე მი-
ესვენება.) შენი ჭირიმე... იცი, მას შემდეგ ბევრჯერ გინატრე.

ვარინკა. ჰოდა, აი მოვედი, შენ გენაცვალე... გულმა მიგრძ-
ნო და გამოვეშურე... მოვედი, რომ სულ წაგიყვანო... ეხლა შენ
სულ ჩემთან იქნები... აბა, წამოჯექ... ცოტაც წამოიწიე...

ნიკალა. ოო, დიდი მადლობა, რომ მოხვედი... მე უგუნურმა,
ეს რა ვქენი... შენც დაგლუპე და ჩემი თავიცა... მე უბედურს ყველა-
ფერი ქართული მწამდა... ზეცაც და მიწაც... სუფრაც და ლხინიც...
ძხეცა და მთვარეც... და რა ღმერთი გამიწყრა, რომ ვილაც გადამ-
თიელ ქალზე გაგცვალე... უუხ, ჩემო თავო!

ვარინკა. შენი ჭირიმე, კარგი, ნუ შფოთავ...

ნიკალა. არა, რამ დამაბრმავა... შენზე უკეთესს ვის ვინატ-

რეზი... ვარინკა-ჯან, მოდი გაკოცო... (შორიდან მოისმის ზარების
რეკა და საეკლესიო გალობა.) ეს რა არის?

ვარინკა. საეკლესიო გალობაა, ჩემო ნიკალა...

ნიკალა. რას გალობენ? ჩემს საპანაშვიდოს?

ვარინკა. დამიდგეს თვალი! რაებს ამბობ... ღმერთმა გაშო-
როს...

ნიკალა. მაშ რას?... უკვე „წმიდაო ღმერთო“?..

ვარინკა. არა, ჭირიმე... ამაღამ აღდგომაა...

ნიკალა. (წამოტორტმანდება). ჰო, ჰო, ამაღამ ლიტანია!
„ქრისტე აღსდგაო“, ამას გალობენ... (სასოებით.) უფალო ღმერ-
თო!.. ჩემთვის უკვე არაფერსა გთხოვ... მხოლოდ ამასლა გემუდა-

რები: აღდგინე ჩემი სამშობლო... მაჩვენე იგი აყვავებული, განათ-
ლებული, გახარებული და საბოლოოდ ბორკილაყრილი!.. (ვარინკას.)

და თუ მე ამას ვერ მოვესწრო, მოდი საფლავთან და ჩამომძახე...
გამეხარდება... (წამოტორტმანდება და უსულოდ დაეცემა იატაკზე.)

ვარინკა. ნიკალა!.. ჩემო ნიკალა! (გვამზე დაემხო და ქვითი-
ნებს. შემოდის კირაკოზა.)

კირაკოზა. ქალბატონო!.. სახლის პატრონი დამაბარა, ამ კაცს
იმისი ვალი მართებს, ხუთი თვის ქირა და ეხლავე გამოგზავნოსო...

ვარინკა (წამოდგება, მრისხანედ შეხედავს). ასე მოახსენე
შენს სახლის პატრონს, რომ ნიკალა ფიროსმანაშვილს აღარავისი
აღარაფერი აღარ მართებს-თქო... თავისი ხალხის წინაშე მან პირ-
ნათლად მოიხადა თავისი ვალი!